

東
華
續
錄

東華續錄

道光十九

臣王先謙敬編

臣周潤蕃恭校

道光九年己丑春正月壬寅諭軍機大臣等張井等奏南河見在
清高於黃開放禦壩日期一摺前因禦黃壩日久未啓節經降旨
令該河督等將河湖全局設法妥辦期收刷黃去淤之益茲據奏
年來堅閉上游各閘不使分流力守禦壩不使倒灌正所以杜致
病之源使大溜挾沙併力趨海特受病太深爲效較遲見在較量
內塘清水已高黃水尺餘卽於二十二日啓除臨黃堰放清水外
出禦壩內外河口淤沙稍資刷滌計見存水誌比上年底水落低
二尺一寸是於黃河不無小效等語河身高仰惟有蓄高湖水藉
以漸去積淤然欲另卅三隄勞費需時固屬未可輕議以見在情

形而論止有東水攻沙之一法該河督等業已詳細講求於海安海阜兩廳隄盡處酌估接築以專歸壚之力其外南廳顏家河等河寬溜散處所則相機築壩以束漫流務當盡力爲之俾河湖漸復舊規朕亦不責成近效但啓壩固以滌淤而蓄清乃可濟運該河督等仍當體察湖水情形可放則放應閉卽閉斷不可任其宣洩消耗過多或致重運經臨難資浮送總之河湖日敝籌畫必須萬全務使空重漕船無阻長河永保安瀾方爲不負委任儻或辦理不善稍有疏失惟該河督等是問懷之勉之○諭朕聞閩廣江浙各省洋面近來雖無大夥匪船仍時有盜劫之案地方文武非竟不查拏每因解省經費無出遂存化大爲小之見並不認真嚴辦若果如此豈非因噎廢食戢暴安良係地方官專責該督撫等自應將緝捕及一切經費豫爲籌畫各州縣距省道里遠近不齊

既不能槩以解費浩繁有所藉口况離省寫遠之處除罪應斬絞並斬絞案內遣軍流徒餘犯外皆有就近解巡道審轉之例何至輒形苦累外海營汛地方如是內地土盜因此從輕完結者亦可想見該督文武果能不分畛域和衷共濟縱或一時偶疏防範迨經緝犯懲辦功過原可相抵每據該督撫陳奏朕無不槩從寬宥其緝捕勤奮者亦皆量予鼓勵豈得稍有畏難養癰貽患各該督撫接奉此旨除向有緝捕等項經費各處無庸籌款外其餘俱應一律酌議量加經費並嚴飭該管文武各官一體和衷力改前習以期安行旅而靖閭閻如嗣後仍有因循規避觀望延擱者卽當據實嚴參懲辦該督撫等亦當認真查察勿涉頽預致干咎戾○丁未諭軍機大臣等據那彥成等奏差人赴卡外籌辦各逆犯情形一摺朕命那彥成前往喀什噶爾止爲籌辦卡內善後事宜業

經將八城善後諸大端籌辦周妥卽爲不負委任是以疊經賞賚
前降恩旨甚明至逆夷家屬及從逆餘黨潛匿卡外原無足重輕
止可檄諭外夷各部落如能擒獻固佳否則任其偷生視息亦不
過釜底游魂有何緊要在我示以寬大無意購致尙恐外夷居爲
奇貨若屢次差人赴彼暗索窮搜終不能得豈不爲外夷所竊笑
其布嚕特各愛曼有來歸附者止可撫戢羈縻亦不必特地招致
指給游牧地方設日久谿壑難盈又將如何籌辦前經屢諭及此
該督何以總未領會豈非必欲邀功轉生出許多枝節見在善後
諸事業經辦竣已另行飭諭武隆阿等遵旨鎮靜辦理該督接奉
此旨著卽迅速起程來京勿再遲留○壬子諭本日楊芳來京召
對見其精神強健朕心實深喜悅楊芳宣力邊疆生擒巨獠前已
加恩錫封三等果勇侯爵賞用紫纁換戴雙眼花翎在御前侍衛

上行走並將伊子楊承注賞給舉人一體會試嗣因受俘禮成復
賞加太子太保銜茲當凱旋入覲允宜再沛恩施楊芳著加恩晉
封二等果勇侯晉加太子太傅銜在紫禁城內騎馬並賞給人漫
四兩緋絲蟒袍一件大卷八絲段袍褂料各一匹大卷江紬袍褂
料各一匹大荷包一對小荷包四箇用示朕懋賞酬庸有加無已
之至意○戊午諭朕因宗室近來積習往往以不干己事具控藉
端訛詐降旨令軍機大臣會同宗人府刑部酌議條例具奏茲據
查明定例分別從嚴酌議嗣後宗室覺羅人等告訐之案察其事
不干己顯係詐騙不遂者該管衙門立案不行仍將該原告咨送
宗人府照違制例杖一百實行重責四十板如敢妄捏干己情由
聲准及至提集人證質審仍係訛詐不遂串結捏控者即將該原
告先行摘去頂帶嚴行審訊並追究主使教誘之犯儻狡辯不承

照例先行板責訊問審係控款虛誣除坐誣罪應斬絞者仍照向
例請旨辦理外其餘誣控之案無論詐賄多寡已未入手但經商
謀捏控不分首從俱實發吉林安置到配仍重責四十板以示懲
儆其主使教誘以及添威助勢之犯無論軍民人等不分首從均
照例發近邊充軍仍先加枷號三箇月滿日再行發遣係旗人照
例銷除旗檔一律辦理即使所控得實但因串詐不遂捏情圖准
者亦卽照此例定擬不准以事出有因量爲援減著宗人府刑部
卽各纂入例冊永遠遵行並由宗人府刊刷條例通傳近支遠支
各族及八旗滿洲旗分咨行步軍統領衙門出示曉諭務令周知
用示朕明刑弼教之至意○己未命楊芳叩謁 東陵 西陵○
庚申諭昨日兵部將擬補甘肅甯遠堡守備楊發陝西撫標左營
守備田大武帶領引見該二員年力精壯均堪造就著交楊芳隨

時訓練策勵成材並著兵部將楊發田大武俱調補固原提標營
守備俾得就近隨同學習用示朕培養人材之至意○諭軍機大
臣等御史章沅奏粵洋通市不得違例私易銀錢請旨飭議章程
一摺向來外洋與內地通市止准以貨易貨例禁綦嚴近日洋商
貨物務爲奇巧炫惑漁利取值不啻數十百倍據該御史奏稱該
洋人賦性狡黠純用機心賣物則必索官銀制錢買物則槩用番
銀夷錢銀低錢薄僅當內地銀錢之什七或仍以番銀給還則斷
不收納是以番銀之行日廣官銀之耗日多至鴉片煙一物流毒
尤甚該處偽標他物名色夾帶入粵每歲易銀至數百萬之多非
尋常偷漏可比若不極力嚴禁弊將何所終極嗣後該省通市務
當恪遵定例止准易貨毋許易銀其番銀之在內地者行用已久
自難驟加遏絕至內地官銀則分毫不准私出其違禁貨物尤應

隨時稽察不准私入著李鴻賓盧坤延隆會同詳查妥議章程具奏○壬戌以劉斯崐爲山東布政使

服闋貴州布政使

○是月給安徽泗

州等五州縣並屯坐衛江蘇海州等十五州縣衛災民口糧展賑兩淮板浦等三場被災貧丁貸山西代州解州水災籽種河南上蔡縣水災倉穀緩徵山東德州等二十三州縣被災額賦

二月乙丑朔諭前據那彥成等奏請將黑帽回子挑補伯克當降旨飭查各城是否向有成例籌議具奏茲據奏稱向來伯克挑用黑帽回子居多白帽回子歷久相安其阿渾向不當差亦不挑用伯克各阿渾子孫人多者止有一二人充當阿渾其餘或自謀生理或充當伯克均聽其便等語著通諭各城以後無論何項回子當阿渾者止准念習經典不准干預公事其阿渾子弟有當差及充當伯克者亦不准再兼阿渾以昭限制○諭軍機大臣等據那

彥成等奏布魯特全部效順酌定歲俸以示羈縻一摺所奏甚屬
冒昧從前乾隆年間平定回疆卡外各布魯特愛曼甚多並無賞
給歲俸之事彼時愛曼中之出力者並非無人如必須給予歲俸
各該辦事大臣早應籌議及此當年從無一人議及可見此事斷
不可行何以那彥成等此次辦理善後因各愛曼陸續來城請安
遞馬極爲恭順援引乾隆年間奇里克沖巴噶什希皮察克等愛
曼曾有世襲歲俸輒行分別等差給予翎頂銀兩段匹發給劄付
令其按年分季持照領賞並令烏什照辦卡外各布魯特部落如
果奮勉出力朕原不靳帑藏量加恩賞見在該夷等雖相率來歸
並無勞績不過請安遞馬那彥成等遽欲給俸以爲羈縻之計國
家無此政體那彥成等卽有此議自當先行具奏請旨乃並未奏
明率行發給劄付那彥成扎隆阿俱著傳旨嚴行申飭此時業給

劄付殊不成事必當設法停止著那彥成扎隆阿體察情形妥爲籌辦據實具奏那彥成著仍遵前旨迅速起程於六月內到京○諭寄諭署喀什噶爾參贊大臣扎隆阿幫辦大臣額爾古倫伊薩克據那彥成等奏差人前往霍罕要出黑帽阿渾奈瑪特等四人並霍罕伯克差人請安遞伯勒克等情朕命那彥成前赴喀什噶爾籌辦善後事宜並未責成伊於卡外接捕要犯及逆裔家屬乃那彥成有意邀功屢次遣人赴卡外刻意接求殊大負委任之意本日復據奏報設法要出黑帽阿渾奈瑪特等四人給予翎頂及賞給元寶細段茶葉等物並有諭霍罕伯克說帖欲其將逆屬弋獲送出斷絕根株如此布置殊可不必見在善後奏定章程業已周妥該大臣等務當遵照前旨嚴密稽察勿任大黃茶葉偷漏出卡亦不得仍令該夷隱混貿易卽爲妥善至於卡外各犯旣已畏

罪遠竄總當置之不問斷不可意存招致妄生邊釁如辦理稍有不善或致大黃茶葉仍有偷漏惟伊等三人是問恐不能當此重咎也○丁卯釋奠 先師孔子以平定回疆告成太學 上親製

碑文勒石大成門外曰征而滅之謂之勦生而致之謂之擒命將出師聲罪致討此可必得之數也戰手張拳生疊駢繫此不可必得之數也矧既已遁逃而猶望其自投羅網尤難之難矣乃失之而復得之且生得之此豈人力哉天也逆回張格爾者爲薩木薩克之子自稱係和卓木後裔嘉慶二十五年沖巴噶什愛曼布魯特比蘇蘭奇與張格爾糾煽回眾殺傷卡倫官兵欲圍喀什噶爾經官兵擊敗張逆等竄逸道光四年張逆復糾合回眾晝夜搶卡官兵殲獲助逆賊目張逆復遁五年差人詐降句結四百餘人爲亂因奈曼部落不從仍復竄赴薩雅克部落句結汰劣克等同來

喀什噶爾滋事巴彥巴圖帶兵出卡遇賊接仗中槍自刎朕諭慶
祥往喀什噶爾督同永芹辦理勦捕事宜旋因永芹病歿以慶祥
爲喀什噶爾參贊大臣六年六月張逆率安集延布魯特五百餘
人夜由開齊山路突至阿爾圖什回莊眾回從逆者多分投搶城
臺路斷絕所調援兵路梗未能猝赴英吉沙爾葉爾羌和闐旣分
兵應援存城兵少賊勢猖獗各城紛紛告急烏什阿克蘇二城亦
俱戒嚴朕遂授長齡爲揚威將軍楊遇春武隆阿爲參贊大臣先
後調派吉林黑龍江官兵三千名各路官兵三萬二千餘名又簡
派巴圖魯侍衛章京等馳往帶兵進勦隨頒發硃諭十條指授機
宜而賊匪擾至阿克蘇渾巴什河南岸屯聚伺隙躡渡經長清達
凌阿巴哈布等督兵晝夜嚴防兩路夾擊殺賊甚夥賊首奔竄追
斃之楊芳按勦阿爾坪從逆賊匪殲戮殆盡七年長齡等於二月

初六日統大兵進剿二十三日至洋阿爾巴特甫經接仗賊勢披靡布魯特俱奔竄二十五日進至沙布都爾莊鏖戰擒戮賊匪數萬二十八日進至阿瓦巴特回莊三次續獲勝仗三月初一日克復喀什噶爾張逆先已乘閒竄逸長齡留喀什噶爾楊遇春等帶兵進剿英吉沙爾葉爾羌以次收復楊芳分剿和闐亦克復其城朕以四城雖定逆首未除諭長齡派兵各要隘安營務確探張逆蹤迹期於必獲五月長齡奏張逆在木吉地方潛匿飭安福等出卡追捕添調楊芳督辦張逆復竄拉克沙地方檄令喀拉提錦部落助擒朕諭楊遇春來京入覲楊芳授爲參贊大臣長齡奏請仍留喀什噶爾朕允其所請並諭以張逆勢雖窮蹙難保其不復來窺伺該將軍等當嚴加防範設法剿擒張逆果於十二月二十七日潛由開齊山路入卡長齡楊芳分統將領連夜剿捕追及於喀

爾鐵蓋山兩路並勦眾賊逃竄張逆僅贖賊黨十餘人情急將自
絕頸總兵胡超等奪刀生擒之餘賊殲戮無遺隨將張逆解大營
檻送闕下獻俘長齡等紅旗報捷閱二十日遞至京師爰錫封長
齡爲威勇公楊芳爲果勇侯其餘將士升賞有差朕思回疆自
皇祖高宗純皇帝平定以來休養生息六十餘年彼回眾踐土食
毛無不感承 聖化乃張格爾以逆裔遺孽招集沙蟲之旅潛行
梟獍之謀朕何敢不導揚 先烈勉迪 前光是役也擒渠於萬
里而遙奏績於一年以內儻有從之眾一鼓就殲而煽惑之魁隻
身遠遁事未稱爲盡善功猶墮於垂成且逆首或畏罪自戕或拒
追被戮雖伸國法未快人心是旣得而猶未得也今則飛蛾赴火
自蹈危機臨陣生擒束手就縛與檄諭外夷設計縛獻者厥功尤
偉然此豈人力所能爲哉罪人斯得 天奪其魄也我武惟揚

天之所助順也禮曰執有罪告成於學故據事書之繫以銘曰惟
我 皇祖拓土開疆大小和卓自取滅亡背恩反噬敢肆鴟張爰
敕將帥翦彼狺狺二酋授首獻馘廟堂懾 威懷 德綏靖遐荒
濟惡作奸薩木薩克逖匿深藏苟延喘息弗忍加誅投畀有北逞
其詭謀爲鬼爲蜮助虐者誰狼心叵測曰安集延曰布魯特根林
帛斷滋蔓難圖蠶張格爾甘自速辜巧營三窟雄長一隅窺邊越
卡常苦覲覲有時擊敗窮若囚拘乘閒而遁終爲逃遁煽亂游魂
稽誅遺孽搶占城垣棄離巢穴虺弄豺兕蜂屯蟻結竟抗顏行羣
效據竊前圍後攻左牽右掣燎之方揚如火烈烈恭行 天討詰
爾戎兵卜云其吉命將邁征三戰三捷克復四城以少勝眾猛助
軍聲狡哉鼠竄惜死偷生神人共憤星掃機槍窮狼投林枯魚泣
釜遁迹莫偵孰製而虜自夏徂冬以防爲堵彼若不來我焉能取

惟天不容倖羅網罟故智復萌餘勇欲賈霜鋒雪甲桓桓我師
賊棄馬走高山屢屢揮弓電閃激矢風追逆渠生縛援戈而麾自
我勦之自我擒之堂堂正正盪定西陲將軍長齡首功懋賞參贊
楊芳壯猷優獎爾公爾侯用褒忠藹大小臣工恩波浩蕩押獻戎
俘乂安邊壤紫閣銘勲凌煙畫像凱歌除夕慶洽元辰萬方送喜
九寓同春肇應靈序允惠黎民如天之福如天之仁告功太
學勒碑成均嚴恭寅畏天之懷遵○己巳上御經筵○庚午

上奉

皇太后幸惠郡王綿愉第○調那丹珠爲盛京兵部侍

郎

由理藩院
侍郎調

○壬申諭軍機大臣等從前乾隆嘉慶年間每遇

聖駕巡幸盛京恭謁

祖陵盛京吉林各將軍均有例進土貢但

止就各該處所產土物呈進以輸忱悃原不准踵事增華徒滋糜

費朕本年八月恭奉

皇太后慈輿前詣盛京祇謁

祖陵該將

軍等著仍准照例呈進土貢惟此次諸事繁從節省該將軍等所進土貢務當比照從前酌加覈減斷不准稍有增多致負朕黜華崇儉之至意○以福勒洪阿爲理藩院左侍郎

由內閣學士通

○癸酉展

緩山東道光七年以前逋賦○戊寅諭那彥成等奏請重申抽收外夷稅課定例一摺回疆自開闢以來曾經奏定章程外夷貨物入卡貿易每三十分抽稅一分原非重科特藉以稽察各夷出入慎重邊防立法本爲至善乃近年以來各城大臣往往因外夷懇求免稅卽量准減免且有全行免稅者殊屬不知大體著通諭喀什噶爾葉爾羌烏什各城大臣嗣後各夷入卡販易務當遵照舊制每三十分抽稅一分無論何處部落槩不准絲毫減免如各城大臣濫行減免稅課著該參贊大臣據實參奏倘參贊大臣有減免情事著伊犁將軍及各城大臣據實參奏均照違制例交部嚴

加議處毋得日久玩視以肅法令○諭軍機大臣等那彥成等奏達爾瓦斯部落遣使遞馬懇求內附酌加賞賜一摺前據那彥成等奏卡外各布嚕特愛曼全行歸順聲明酌賞俸銀俸段朕卽以其事涉冒昧降旨令那彥成扎隆阿設法停止茲復據奏達爾瓦斯伯克差額爾沁沙阿布都拉等帶同跟役前來請安遞馬並呈遞稟帖情詞恭順擬照見議酌賞布嚕特歲俸章程一體辦理等語邊疆重務全在鎮靜撫綏卽布嚕特等果有誠心歸附者亦止當就地羈縻從無酌給歲俸之事達爾瓦斯遠在霍罕西南若以其向與霍罕爲仇人民亦屬強富遂欲將該部落招致收服以爲鈐制霍罕之計實屬不成政體且外夷部落如果蠻觸相爭天朝從不過問那彥成等所稱該夷希冀中國勦滅霍罕坐收其地諭以靜聽霍罕輕離巢穴乘機深入俟有用汝等之時再差人告知

一節殊不成語此等外夷貪黷性成豈肯真心樂爲我用正當開
誠布公使知安分守己何得以此言向其傳說致該夷妄生冀倖
朕命那彥成辦理善後事宜原不應妄圖卡外之事乃於此處費
心饒舌甚可不必所有諭帖內的賞達爾瓦斯銀段給與割付之
處斷不可行著仍遵前旨設法停止至另片奏達爾瓦斯伯克懇
求瞻覲諭令靜候諭旨再定行止所見尙屬得體著那彥成等傳
諭該伯克差來之額爾沁等以爾伯克情願遣人進貢具見惻誠
深堪嘉獎但爾部落距京寫遠見已奏明大皇帝不忍爾等跋涉
毋庸進京如此剴切宣諭該夷等必當感激恩施那彥成接奉此
旨仍著迅速起程限於六月內到京○以卡外夷情靜謐裁減喀
什噶爾等五城換防官兵並定年限○壬辰諭軍機大臣等張井
等奏重運首幫漕船於本月二十一日相機倒塘瀝放已過幫船

三百九十餘隻並將銅船劍船趲放全數渡黃水高於清水尺餘尙未倒灌等語所辦好此時來源頗旺漕船抵壩守候不能不權宜灌放嗣後幫船陸續前來該督總當察看水勢相機妥辦遇有可乘之機立即啓壩放船俾得迅速趲渡當不待諄諄諭也

○甲午裁山西平定州甘桃驛驛丞復設陽曲縣蘭村主簿

三月己亥 上親耕藉田○庚子召董誥來京以桂良爲四川布

政使惠吉爲河南按察使

由山東充沂
曹濟道遷

○丙午 上幸南苑行圍

○辛亥諭軍機大臣等惠顯等奏拉達克部長呈進奏書哈達花紬謝恩一摺前因拉達克擊解逆回加恩賞給該部長及小頭目薩莫等頂翎綢段茲據惠顯等奏該部長敬備奏書一分哈達一方花紬一匹祈爲代進因與體制不符未敢遽行呈進亦不便卽行駁回見將遞到各件暫爲收存請旨辦理等語西藏沿邊小部

落遇有事件向未呈遞奏書拉達克本非廓爾喀之列在藩封者可比今呈遞奏書等件原與向來體制不合該大臣等所見尙是但該部長究因賞給頂翎備物謝恩且奏書等件業已遞到收存若遽行駁回轉恐該部長別生疑慮所有此次呈遞之件著該大臣等遇便呈進並著傳諭該部長以爾部落原不應呈遞奏書茲經本大臣據情奏聞大皇帝嘉爾恭順姑准呈進此乃格外施恩並示體恤之意○壬子 上還京師○癸丑諭鄂山奏請將丁憂同知服闋仍發陝省補用等語陝西丁憂同知鄭謙服闋後例應歸部銓選茲據該撫奏稱該員熟悉地方情形請於服闋後仍發原省補用與例不符且恐各省紛紛陳奏易滋流弊所請著不准行○甲寅 上御閱武樓閱京營兵○戊午召琦善來京以訥爾經額爲山東巡撫朱桂楨爲漕運總督調卹樹棠爲倉場侍郎以

祁墳爲刑部右侍郎鄂順安爲貴州布政使調岳良爲福建按察使以恩特亨額爲安徽按察使

由山東路東
泰武臨道遷

○庚申以隆文爲內

閣學士兼禮部侍郎銜

由唐
事遷

○壬戌諭見在京中能書拉體訥字

者止有謝覲廷一人遇有應譯應寫文移等件無人接續辦理著李鴻賓延隆於廣東洋行貿易漢人能譯寫拉體訥字通曉文理者揀選二人奏明送京給與錢糧當差

夏四月癸酉召戴三錫來京以琦善爲四川總督○丙子諭孫爾準等甄別府廳知縣一摺知縣改補教職從前定例除自行呈請改教者不拘年限外其由督撫甄別之員責任已逾半年卽以原品休致槩不准復行改教道光二年復經御史趙丙陳奏降旨通行茲該督等以宣德縣知縣李瓊標才識迂拘難膺民社因係舉人出身請以教職改用該員在任已及四年既係才不勝任卽應

勒令休致所請以教職改用之處著不准行嗣後各省督撫甄別
屬員務須遵例覈辦如有蒙混具奏者定卽重懲不貸○己卯諭
松筠等奏拾獲匿名揭帖因關繫通省政治官方據實密奏一摺
匿名告訐最爲風俗人心之害會奉 皇考仁宗睿皇帝諭旨有
拾獲者卽行銷毀不准具奏茲松筠因揭帖內指控該省大吏不
敢不密行陳奏摺內已將定例聲明尙無不合惟揭控各款如果
屬實何不出名呈控逞此鬼蜮伎倆甚爲可惡著將所拾揭帖發
交松筠卽行銷毀嗣後凡有拾獲匿名揭帖者仍照定例將原帖
銷毀斷不准率行入奏致干吏議○諭松筠等奏參直隸疏失餉
鞘審辦錯謬各員請分別交議一摺此案外委白勤被誣到官保
定府知府白明義並不虛衷研鞫訪求賊證率以傳播謠言疊次
熬審致令病斃又不將白勤致死緣由卽行稟報直至二月初三

日始行出詳尤屬任意遲延署臬司清河道陶樑風聞無據之言
不行確查輒稟該護督提省審辦又不嚴飭該府悉心查審咎有
應得白明義陶樑俱著交部嚴加議處委審候補知縣歐聲振隨
同鞠訊未能究出被誣實情著交部議處護理直隸總督屠之申
於御史王琦慶所參欲爲屬員開脫處分一節雖非徇庇究屬遲
延且於白勤被誣之案不察虛實輒委守備楊銘查拏旣不能究
出教供情弊又未審有端倪率行具奏雖於摺內未經聲敘白勤
病故緣由因該府遲延所致何至近在同城漫無覺察迫據詳報
又不卽時奏辦種種錯謬咎無可辭著交部嚴加議處尋議屬之
申降三級調用陶樑降四級調用白明義革職歐聲振降一級調
用從之○壬午以松筠署直隸總督○調顏伯燾爲直隸布政使
由甘肅調以李振翥署直隸按察使由天津道署○癸未以方載豫爲甘肅

布政使孔昭虔爲陝西按察使由江西樞道遷○丙戌 上奉 皇太后

御含輝樓閣 皇子及侍衛等騎射○顧皋以病免調汪守和爲

戶部左侍郎轉史致儼爲禮部左侍郎以楊懌曾爲禮部右侍郎

出左副都御史遷○戊子賜李振鈞等二百二十一人進士及第出身有

差○是月貸湖南乾州等五廳州縣上年旱災口糧籽種山西朔

州等二十三州廳縣歉收倉穀緩徵江蘇阜甯等五縣衛水災額

賦

五月丁酉奉移 孝穆皇后梓宮於寶華峪正殿 神牌於東配

殿命 皇長子奕緯行禮○己亥諭每年恭祭 太廟祝文內敬

書 列后徽號向不恭讀嗣後祝版除敬將 列后廟號尊諡照

常恭繕外無庸再書 徽號以昭敬慎○乙巳諭本年朕恭奉

皇太后前詣盛京經過直隸地方一切除道清塵止須酌派近屬

各員幫同承辦官分段經理不准仍前多派以重職守○己未諭
內外各衙門題奏事件遇有地名字面理應遵照全寫如熱河之
但稱爲熱多倫諾爾之但稱爲諾烏魯木齊止稱爲烏順天府節
稱爲順乾隆嘉慶年間歷經 聖諭訓飭並載入則例凡遇地名
字面不得率用省文各該衙門自宜永遠恪遵本日據扎隆阿等
奏請將餘糧酌改折色摺內葉爾羌書寫葉城並有阿烏喀三城
字樣實屬簡率不成文理著再行通諭各衙門嗣後於應載地名
字面務遵定例全行書寫斷不可任聽幕友胥吏止圖省便致於
體制有乖○辛酉諭軍機大臣等李鴻賓等奏越南國差官護送
廣東遭風生監回省順帶貨物來粵售賣並請通市貿易一摺此
次越南國王因內地生監遭風漂收到境恤給衣糧盤費護送回
粵實屬恭順可嘉所有帶來各貨及將來出口貨物均著加恩免

其納稅至該國王請由海道來粵通市貿易一節自當照例駁回但須妥爲曉示著李鴻賓等傳諭該國王見據爾國王請由海道來粵通市業經奏聞大皇帝以爾國王久列藩封素爲恭順爾國地界毗連兩廣向與內地商民有陸路交易處所貨物流通足資利用非他國遠隔重洋必須航海載運者可比外夷諸國如有於各海口越界求通貿易例禁甚嚴今若允爾國王所請誠恐各外夷船隻偶有攙越滙入以致滋生事端於爾國王諸多未便轉非所以示體恤是以仍令爾國王恪守舊章於廣東欽州及廣西水口等關各陸路往來貿易毋庸由海道前來此係大皇帝格外恩施曲加優眷爾國王其善體此意敬謹遵循爲要如此明白宣諭於示以限制之中仍寓撫綏之道該督等接奉此旨卽行遵照妥爲辦理○定三四品京堂服滿通補例○是月貸湖北荊州城守

水師二營及宜都營被水倉穀緩徵河南濟源杞縣災歉額賦

六月丁卯以桂齡爲左副都御史

由大理寺卿遷

○甲戌以王麟爲伊犁

將軍調松筠爲兵部尙書仍署直隸總督以博啓圖爲禮部尙書

由內大臣遷

○癸未以薩迎阿爲河南布政使程喬采爲甘肅按察使

由蔚州道遷

○己丑命那彥成回直隸總督任○葉爾羌顯忠祠成予

新舊殉節諸臣入祀並附祀殉節伯克回民○是月貸三姓地方
上年被水倉穀展緩兩淮板浦等三場積歉逋課

東華續錄

道光二十

臣王先謙敬編

臣周澍蕃恭校

秋七月癸巳朔命張井籌辦南河蕭南廳等工並改建運河滾水壩○辛丑諭朕召見武隆阿詢及喀什噶爾軍務情形伊奏對時詞多掩飾特令御前大臣軍機大臣公同詢問據稱伊在軍營聞張格爾復來卡外窺伺曾向長齡言及欲行前往長齡向其阻止伊云尙可勉力督帶馬隊武隆阿前於大兵進剿打仗三次旋即患病至張格爾復行進卡時伊尙不能乘騎安能督帶馬隊其派令黑帽回子截擊張逆本係長齡在彼公商定議出示曉諭乃伊在朕前口稱係伊指派實屬有心含混不知愧懼且於陝甘凱撤征兵一事又復辦理不善武隆阿著降爲頭等侍衛在大門上行

走伊子侍衛慶安著逐出乾清門亦在大門上行走以示懲儆○

以周之琦爲廣西布政使王定柱爲浙江按察使由兩淮鹽運使遷○癸

丑諭軍機大臣等此次隨往盛京之總管首領太監等人數眾多

恐有不法之人沿途生事業經諭令總管內務府大臣定立章程

嚴查需索訛詐之人按例究治矣因思 壽康宮及壽康東宮儲

秀宮鍾粹宮之首領太監等恃無見證難保無假捏指稱諸弊著

隨扈之總管內務府大臣等隨時嚴密稽查此四處之首領太監

內如有向隨扈大臣官員或地方官員指稱傳行情事無論事之

大小著禪恩等卽行指名封奏立將該首領太監鎖拏交慎刑司

重責八十板卽日發黑龍江給兵丁爲奴遇赦不赦該管之總管

罰月銀半年革退首領如係首領犯法其該管之總管罰月銀一

年決不寬恕此係朕防微杜漸之深意禱恩敬徵寶興務善體朕

心認真查辦並諭那彥成奕顯知之如有此等情弊必當隨時具奏如繕摺不及而告軍機大臣可也諸臣稍存姑息避就之見獨不慮日後發覺何顏見朕耶○丁巳諭外夷各國貢道或由水路或由陸路定制遵行未可輕言改易越南國遣使來京進貢自康熙年間議定由陸路行走今該國陪臣於進表後在禮部呈遞稟啓欲改由廣東水路該部以事涉更張實不可行議駁甚是所有該陪臣稟請改由水路以省勞費之處著無庸議至該陪臣稟稱該國王之母年已七旬需用人薄調養懇請賞賜薄斤以例賞各件折給一節此係該國王孝養至情與無故率行祈請者有間著加恩賞給人薄一斤其例賞各件仍著照例賞給○庚申諭每年朕於八月由圓明園進宮設儀仗作樂王公文武大臣於三座門前接駕繁文縟節朕無取焉著自本年爲始每屆八月進宮回園

之期將儀仗作樂及王公各大臣接駕之處俱行停止○是月賑廣西雒容永福二縣水災免安徽泗州五河縣鳳陽泗州二衛上年被水錢糧十分之一

八月壬戌朔禁隨行校尉等沿途滋事犯者照搶奪例治罪○以

戴宗沅爲河南布政使花杰爲直隸按察使

由四川陞
茶道遷

○乙丑諭

御史張曾奏請飭禁刊刻落卷以端士習一摺所奏是掄才大典棄取一秉至公在士子果有屈抑原許赴該管衙門控訴若於未發榜以前鈔錄開文送人批點並榜後刊刻落卷均干例禁茲據該御史奏稱本科有浙江舉人顧宗伊刊刻落卷散布流傳之事是否屬實著禮部查明具奏○己巳暹羅國王以平定回疆遣使

表賀進方物○庚午以惠顯爲理藩院左侍郎

由駐藏
大臣遷

○丁丑諭

工部奏查明張井奏道光七年另案工程銀數比較單內共用銀

二百九十七萬三千二百二十九兩零內稱專案辦理各工用銀六十五萬二千三百四十五兩零非常年所有之工不入比較南河自道光六七兩年增培堰圩大隄用銀一百四十八萬五千八百餘兩該河督奏內並未聲明堰圩缺口善後係奏明增培或統歸比較其餘均係常年另案工程該河督何得於此內復行剔出銀六十五萬二千三百餘兩以爲專案辦理非常年所有爲詞殊非覈實辦公之道國家經費有常自宜加意撙節若每年比較懸殊於另案之外復添專案名目豈非爲開銷地步著該河督嗣後彙奏一年另案銀數單內除歲修搶修定額外如實係興舉大工應於摺內奏明不入比較其餘常年奏明另案工程均合併入單內開明將上三年用過銀數聲明比較毋得另立專案辦理名目以杜虛浮而昭覈實○以戴三錫署工部左侍郎

前任四川總督○己卯

諭禮部查明御史張曾奏參浙江舉人顧宗伊刊刻落卷屬實並
檢查所刻卷內附載致同考官袁文祥書大肆譏評此風斷不可
長考試爲掄才大典士子若實被屈抑原有准赴該管衙門控訴
之條乃該舉人不安義命妄生怨尤輒刊刻傳布且附載譏評該
同考官原札實於士習人心大有關係顧宗伊著卽褫革舉人以
示懲儆至檢討袁文祥閱看試卷如僅將士子頭場三藝點看起
請卽行棄置實屬草率見在顧宗伊已將原卷領出回籍著劉彬
士卽飭屬追取攜回場卷送禮部查驗如果屬實再將該檢討袁
文祥移咨吏部議處其批點之內閣學士朱方增翰林院修撰朱
昌頤工部候補主事顧椿俱著交部照例議處○以鐵麟爲左副
都御史由光祿寺卿遷○庚辰 上奉 皇太后詣盛京謁 祖陵啓鑾
○辛巳定江蘇沿江沿海新漲沙洲召佃章程○丙戌免經過大

興等八縣通州等四州本年額賦十分之五旗租十分之三○丁亥諭審忠親王多爾袞當 太宗文皇帝時統師征明戰功甚多厥後首先率師入關將流賊立即驅除大勦耆定恭迎 世祖章皇帝定鼎燕京忠誠懋著乾隆四十三年我 皇祖高宗純皇帝特降 諭旨復爵予諡配享立後用敘成勞朕此次祇謁 祖陵路經永平指日出關皆係當時殄滅流賊之地王之大勦偉績實堪嘉尚著賜祭一壇派惠郡王縣愉前往王墓代奠審親王仁壽著加恩賞戴三眼花翎在內廷行走御前大臣戶部尚書禧恩著加恩賞戴雙眼花翎以示朕眷念勳親至意○是月緩徵廣東南海三水二縣水災額賦長蘆被淹黿課

九月壬辰朔日有食之○癸巳免經過甯遠等五州廳縣本年額賦及幫辦差務之遼陽等九州廳縣本年額賦十分之五○戊戌

上詣 北鎮廟行禮○己亥諭朕恭謁 祖陵經過關內關外

秋成豐登閭閻安謐黃童白叟夾道歡迎實深嘉悅仰惟我朝肇
基東土二百年來 列祖 列宗厚澤深仁周徧寰宇朕鑾輅經

臨瞻雲就日愛戴出於至誠可見小民具有天良朕無日不以敬

天法 祖勤政愛民爲念封疆大吏當仰體朕意潔己惟清泣

事惟公嚴貪冒之防戒因循之習務期大法小廉吏治蒸蒸日上
俾民皆安居樂業尊君親上之心油然而生風俗益厚人心益淳
有厚望焉○甲辰諭軍機大臣等扎隆阿奏接據布庫愛曼布魯
特比却喇遣五品頂翎巴喇特到卡稟報汰劣克見被誘獲當令
伊薩克飭令巴喇特旋回遵照前發諭帖傳示並未遣人出卡查
探並咨會烏什辦事大臣常德等一律辦理等語汰劣克從前雖
爲張逆助勢未敢進卡近因釋放其子遣人叩謝感激天恩今却

喇與之自構罅隙將其誘獲意圖賞賚藉洩私仇該參贊大臣鑒其肺肝拒絕不問所見正大之至該大臣有如此安邊材略朕嘉獎之餘別無可諭著發去玉翎管一件玉雙喜佩一件小荷包四箇交該大臣祇領以示恩賚○乙巳 上親射並閱盛京官兵等騎射○丙午閱吉林官兵等騎射○丁未 上謁 永陵○諭本日蹕路經行至馬爾墩嶺東見有民人欲由御道之右行至左邊彼時博啓圖隨扈在右止須勒馬即可攔住乃僅用馬鞭略爲指揮徑卽前行並未回顧以致該民人竟從御道後經過博啓圖近在御前漫不經心所司何事非尋常疏忽可比著交行在吏部議處三日內具奏再本日博啓圖等奏盛京吉林官兵射中布靶恩賞銀兩摺單內並未將銀數分晰開明亦屬含混博啓圖實與俱著傳旨嚴行申飭○戊申行大饗禮○閱興京城○己酉諭行在

吏部議奏御前大臣禮部尙書博啓圖照約束不嚴例加等請降
三級調用得旨博啓圖著革去尙書都統降補兵部右侍郎仍降
三級留任不准抵銷○以耆英爲禮部尙書調寶興爲戶部右侍
郎轉保昌爲兵部左侍郎○王子 上謁 福陵○臨奠宏毅公
額亦都墓○癸丑行大饗禮 上謁 昭陵○臨奠武勳王揚古
利墓○甲寅行大饗禮 上至盛京詣 太廟尊藏 寶冊前行
禮○遣官致祭 壽康太妃 懿靖太貴妃 康惠淑妃並公主
園寢奠親王貝勒大臣等墓○奉 皇太后居介祉宮 御崇政
殿賜御前大臣及蒙古王公等茶○遣官祭 長白山 遼陽太
子河 巨流河 渾河 北海 松花江諸神及 遼太祖陵○
免盛京興京等十五處旗地額賦十分之五及積年逋賦○免盛
京各莊頭本年應交倉糧○乙卯 上詣 天壇 堂子行禮○

詣 文廟瞻禮○臨莫克勤郡王岳託墓○加恩開國王裔封賞
有差○定喀什噶爾西北邊界添設八處卡倫弁兵輪巡章程○
朝鮮國王李玢遣使進表貢方物○賞隨扈蒙古王貝勒貝子白
吉等銀○廣盛京滿合二號及奉天所屬科考學額○丙辰 上
以恭謁 祖陵禮成奉 皇太后御頤和殿行慶賀禮 御崇政
殿受朝賀頒詔天下恩賚有差○賜扈從王以下及盛京吉林將
軍等食並賞賚有差○免奉天官兵借支俸餉銀○戊午 上詣
地壇行禮○臨莫直義公費英東墓○以揚古利後裔玉芳爲
頭等侍衛額亦都後裔巴雅爾綽克托和世泰費英東後裔盛桂
爲散秩大臣○己未 上御大政殿賜扈從王公大臣蒙古王貝
勒貝子公及盛京文武官員朝鮮使臣等宴 上奉 皇太后回
鑾○諭閩浙總督孫爾準閩浙總督福建巡撫每年秋閒例貢蜜

浸荔支是物並無供獻之需且恐發熱朕又不嘗實屬無謂著自本年爲始永行停止並諭韓克均知之○庚申諭那彥成奏州縣自理詞訟請仍實成道府稽查以符定例一摺前據松筠奏清釐案牘覈定功過章程令各州縣將已結未結控案按月具報統計三箇月奏聞一次見據該督奏稱已屆彙奏之期查明各屬詳報自理詞訟月計不下數千案積至三月累牘甚至萬有餘件瑣細繁多殊於政體未協至考察州縣記功記過向止飭司存記並不具奏亦不報部若卽以此定爲勸懲形諸奏牘是又於議敘處分之外復添條款實屬紛雜著照所請除題奏咨部外及內控上控案件逾限照例參處外其各州縣各理詞訟仍照定例實成道府廳州縣嚴查循環簿籍將已結未結寢息續控案數按季造冊報明督撫衙門及藩臬兩司查考仍比較勤惰分別功過歸於年終

甄別案內彙總覈辦如有過多功少才不勝任者奏明分別降改以符體制所有松筠議請三箇月具奏一次之處著卽停止○是月緩徵河南延津等十一縣歉收陝西西安乾州二府州旱災新舊額賦

冬十月壬戌朔兩淮鹽政福森奏查明鹽務大槩情形得旨兩淮鹽政弊壞已極皆由歷任鹽政自顧身家不以公事爲重或苟且因循不知天良爲何事實堪痛恨汝係朕特用之人必當奮發有爲力挽積習盡心整理任勞任怨諱記勿忘如有起色何患不承朕恩若同前任依樣葫蘆汝自知之勉之又勉○甲戌 上奉

皇太后幸澄海樓○戊寅諭容安奏籌禁大黃茶葉潛通外夷詳酌見行實在情形一摺庫爾喀喇烏蘇所屬奎屯地方設卡稽查不准細茶雜茶販入伊犁塔爾巴哈台境內一年以來西北兩路

私販之源已絕而安集延交結偷漏之弊亦除伊犁塔爾巴哈台
兩處所需附茶及大小斤茶該商民等照常販運食用無虞缺乏
見在邊境相安著該將軍參贊嚴飭奎屯派撥官兵認真稽查嚴
禁細茶私販入境並奎屯及塔爾奇第一臺卡房兵弁毋許勒索
留難違者准商民等控告懲辦加等治罪其沿邊各卡倫隨時加
意巡防不可日久稍有疏懈○己卯召烏爾恭額來京調程爾采
爲廣東按察使以惠豐爲甘肅按察使由直隸肅
昌道遷○庚辰召富呢

揚阿來京以岳良爲江西按察使調惠吉爲福建按察使以麟慶

爲河南按察使

由開歸陳
許道遷

○壬午

上謁

裕陵命惇親王縣愷

詣昭西陵睿親王仁壽詣

孝陵慶郡王縣愷詣

景陵行禮

貝勒奕綸祭

孝穆皇后殯宮○

甲申以吳光悅爲江西巡撫韓

文綺爲左副都御史

由江西
巡撫遷

○乙酉

上奉

皇太后還京師○

庚寅諭御史姜梅奏書吏役滿飭令回籍原因該書吏等充役有年熟悉衙門事務易啓句通賄屬之弊是以役滿不准逗留在京立法至爲嚴密如該御史所稱近來役滿書吏回籍者不過十之一二並有因役滿之後又有冒入大興宛平籍貫改名捐納微職以候選爲名遂得潛留京中串通綫索或說事過財或指名撞騙或造作假僞或幫同訛詐其弊不一而足至戶部捐納房書吏向係本衙門貼寫充補亦俟五年役滿另行更換該書吏等雖係貼寫亦應與役滿經承一體飭令回籍嗣後各該衙門書吏役滿後著隨時行知順天府五城勒限卽回原籍其充役將及五年無故具呈告退者亦著督飭回籍儻有役滿後改名冒入大興宛平籍貫捐納職官並戶部捐納房役滿貼寫著一併嚴查照例辦理不准在京稽留以除積弊○是月給安徽泗州等五州縣衛一月口

糧緩徵山東濟甯等二十一州縣衛直隸滄州等十二州縣水災
旱災浙江仁和等五縣旱災額賦安徽泗州等二十四州縣衛水
災旱災江蘇高郵等三十三州縣淮安等四衛被災湖北荊門等
十三州縣衛水災新舊額賦展緩湖南澧州等三州縣積歉額賦
十一月辛卯朔賜吳鉞等三十六人武進士及第出身有差○丁
酉 皇三子奕繼生○戊戌諭御史何輝綬奏請定保舉御史章
程一摺所奏甚是御史爲風憲之官必當慎重遴選此次保送御
史內兵部郎中李煥曾任湖北荊州府知府因才不勝任改用今
職刑部郎中錢學彬前在福建泉州府知府任內有意規避以才
不勝任請改京職部議革職旋經捐復員外郎推升郎中復蒙混
截取繁缺知府部議降調又經捐復郎中此等人員何得濫行保
送御史李煥錢學彬均著該部卽行扣除無庸帶領引見嗣後各

部院堂官於所屬司員內凡因私罪降補京職及不勝外任特旨
改用人員不准保送御史並不得截取外用○辛丑封未婚守節
輔國公拉旺哩克森聘妻莊襄親王縣課女爲貞憫和碩格格○
己酉定一子兩祧服制○丁巳以裕恩爲熱河都統調保昌爲吏
部右侍郎轉博啓圖爲兵部左侍郎以桂輪爲兵部右侍郎由內閣學
士○是月賑奉天遼陽等五處被災旗民口糧緩徵錦縣歛收額
賦甘肅狄道等十五州縣水災新舊額賦

十一月甲子緬甸國王孟旣以生擒逆裔遣使表賀○乙丑諭軍
機大臣等李鴻賓奏英吉利商船延不進口及曉諭防備各緣由
等語所奏甚是各國夷船來粵貿易惟英吉利大班等因洋行連
年閉歇拖欠夷銀疊次呈控並臚列條款具稟查辦該督業經咨
提商人訊追並將所稟各款飭司妥議諭令洋商轉諭恪遵該商

船仍然觀望停泊澳門外洋延不進口該國貨船每言在粵海關約納稅銀六七十萬兩在該國以爲奇貨可居殊不知自天朝視之實屬無關毫末且該洋船私帶鴉片煙泥入口偷買內地官銀出洋以外洋之腐穢巧獲重貲使內地之精華潛歸遠耗得少失多爲害不可勝言必應實力嚴查此次該洋商業經該督將來稟嚴行批飭如果漸知悔悟相率進口即可相安無事儻仍所求未遂故作刁難著卽不准開船嚴行驅逐卽少此一國貨稅於國帑所損無幾而洋煙不入官銀不出所全實多該督已密行咨會李增階飭令各營將弁等不動聲色整齊防備所辦甚是該督等務當鎮靜防閑詞嚴義正斷不可稍涉遷就其該洋商稟內夷船規銀不論船隻大小一律徵收懇請分別納餉等款尙可量爲變通著該督等妥議具奏○召誠端來京以富呢揚阿爲盛京工部侍

郎前任江西布政使

○戊辰

上誚

大高殿祈雪

○以回疆軍務高堰

隄工告竣免兩淮鹽斤加價○己巳以劉重麟爲江西按察使

建臺灣道遷

○辛未定科布多各卡並滿洲蒙古綠營各臺站屯田官

兵糧穀分別折給銀兩章程○癸酉諭伊薩克所封郡王著加恩

世襲罔替○丙子諭禮部議准御史牛鑑奏請以李容從祀

文廟一摺先儒升祔學宮祀典至鉅必其人學術精純經綸卓越方

可俎豆馨香用昭崇報若僅著述家官闡明心性未有躬行實踐

超越等倫列祀鄉賢已足彰褒旌之義豈宜升祔

廟廷稍滋冒濫綜覈李容生平學行雖足爲閭黨矜式然似此者亦豈乏人何

能盡登兩廡該部請如該御史所奏准其從祀

文廟之處著無庸議○諭軍機大臣等朕聞外夷洋錢有大髻小髻蓮頭蝙蝠雙

柱馬劍諸名在內地行使不以買貨專以買銀暗中消耗每一文

抵換內地紋銀計折耗二三分自閩廣江西浙江江蘇漸至黃河以南各省洋錢盛行凡完納錢糧及商賈交易無一不用洋錢番船以販貨爲名專帶洋錢至各省海口收買紋銀致內地銀兩日少洋錢日多近年銀價日昂未必不由於此又鴉片流行內地吸者日眾鬻者愈多幾與火菸相等耗財傷人日甚一日皆由番船裝載鴉片駛至澳門廈門等處附近關津停泊或勾通書差暗中抽稅包庇進關或巡哨兵役游奕往來私爲奸人夾帶代爲發販或得規容隱任聽番船分銷各省商船載往各處售賣行銷之路既多來者日眾該兵丁等且藉以抽分吸用賤價留買南北各省情形如出一轍較洋錢之害爲尤甚若不究明弊源嚴行查禁不特徒滋紛擾轉使作奸犯科之輩益復無所顧忌前因內地閒有夷錢攙雜行使曾經降旨飭禁然尙不似洋錢行使之多折耗之

甚至鴉片煙泥則又以外洋之腐穢潛耗內地銀兩昨據李鴻賓等密陳英吉利請改貿易章程摺內亦經籌議及此該督等通達治體深悉積弊必須將如何截其來路如何禁其分銷期於言出法隨不至徒爲文告故事有名無實方爲妥善該督等素稱曉事當能仰體朕意○戊寅以聯順爲內閣學士兼禮部侍郎銜由頭等侍衛○壬午穆克登額卒以長齡累禮部尚書○戊子 皇三子奕繼薨○是月賑山東益都臨朐二縣地震災蠲直隸隆平甯晉二縣窪地額賦之五級徵兩淮丁縣等六場旱災新舊賦課甯古塔三姓歉收額賦○是歲朝鮮琉球越南暹羅緬甸入貢○會計天下民穀數各省通共大小男婦三萬九千五十萬六百五十名口各省通共存倉米穀三千三百八十萬六千一百六十石一斗三升八合六勺

東華續錄

道光二十一

臣王先謙敬編

臣周嗣蕃恭校

道光十年庚寅春正月乙未諭正大光明殿入宴之大臣等皆在廊下謝坐謝宴著爲令○丙午程含章以病免以魏元烺爲福建布政使

服闋廣東布政使

○庚戌諭軍機大臣等寄諭大學士兩江總督

蔣攸銛湖廣總督高孚江西巡撫吳光悅河南巡撫楊國楨兩淮鹽務見在敝壞已極固由歷任鹽政辦理不善而引滯課虧亦未必不由於私梟之侵越上年福森奏請本年開印後馳赴楚省會同該督撫設法疏銷朕以江西口岸見已滯銷諭令該鹽政酌量便道至江西一併察看惟淮鹽之累總由引積而疏引之法首在緝私私鹽之爲害不獨有妨引課且梟徒聚集擾害地方尤爲可

惡淮鹽引地最廣各口岸私販眾多該地方官或以事涉鹽務意存畛域並不實力緝拏必致梟徒毫無顧忌愈積愈多勢將何所底止著各該督撫嚴飭所屬文武員弁認真巡查遇有大夥私販立即嚴拏懲辦務期奸徒斂迹鹽務日有起色儻因循不辦以致私梟充斥惟各該督撫是問○乙卯定喀什噶爾等處商回私越卡倫出入交易罪例○丙辰以徐鏞爲貴州按察使由四川成縣龍茂道遷○丁巳暹羅國王鄭福以回疆底定遣使表賀貢方物○是月賑江蘇沛縣安徽盱眙等六州縣水災旱災貸直隸滄州鹽山二州縣甘肅皋蘭等十四州縣水災旱災銀穀展緩山東陽信等二十一州縣衛水災旱災風災蟲災新舊額賦

二月壬戌 上御經筵○乙丑諭御史王瑋慶奏六部重修則例宜率舊章如有更改應專摺奏明通行一摺各衙門頒行例令原

期垂諸久遠其有今昔異宜者固應隨時酌改然不必定限十年
卽開館重修一次若如該御史所稱各部則例十年一修往往不
能依限告成每遲至六七年始刊刻完竣又未能卽時頒發其間
數年之久各省官員旣無新例可遵又謂舊例已改茫無所指而
書吏得以高下其手及至刊刻頒行將屆則例重修之時新例又
成廢本無所遵循且有舊例本屬美備因回護辦法兩歧或致舍
例就案輕爲更改甚或因開館爲書吏邀請議敘地步種種情弊
實不能保其必無嗣後各部已頒成例毋得輕議更張如有因時
制宜必應更正之處隨時專摺奏明改定立即通行各省一體遵
照以免書吏影射弊混不必定限十年開館重修致滋流弊○甲
戌諭軍機大臣等楊遇春奏懇免口外梨貢一摺口外梨貢向例
由陝甘總督衙門差派弁兵赴吐魯番採買進貢該處距內地數

千餘里所辦梨果仍交伯克代爲採購惟念該處窮苦回子咸藉所藝梨果爲生每年差往弁兵雖經嚴立期限飭令照額採辦毋許擾累誠恐道遠稽察難周其承辦之大小伯克展轉假手亦不免有藉端滋擾之弊著自本年爲始將此項梨貢卽行停止以杜滋擾而示體恤○癸未頒 御製詩初集○丁亥建喀什噶爾死事諸臣祠賜名彰忠

三月庚寅追予江蘇宜興荆谿二縣明季殉節士女祠祀○癸巳諭軍機大臣等李鴻賓等奏妥議酌減夷船進口規銀一摺各國夷船來粵貿易於船鈔貨稅之外另有進口規銀一項原與正餉不同據該督等查明懇請量爲變通著照所請嗣後各國夷船進口規銀倣照康熙二十四年酌減洋船鈔銀二分之例將一二三等各船規銀均減去十分之二以示體恤○乙未申諭刑部依限

審結咨案○己亥 上親耕藉田○壬寅 上奉 皇太后啓鑾
謁 西陵○免經過地方額賦十分之三○甲辰飭逐盛京城內
外戲班雜劇○丙午 上謁 泰陵 泰東陵 昌陵回鑾○戊
申 上恭送 皇太后還京師○己酉 上幸南苑行圍○甲寅
上還京師○是月緩徵河南湯陰縣涸復地賦貸湖南乾州等
五廳縣屯丁及苗佃籽種口糧

夏四月庚午申禁銅鉛各船夾帶私鹽○甲戌諭鑾儀衛奏此次
恭祭 天壇請照例豫備玉輦禮轎一摺朕思恭祭 天壇惟在
心存誠敬卽不乘輦亦無不可著交該衙門嗣後如遇恭祭 天
壇日期玉輦金輦俱著在天安門外豫備所有擡輦人役或另派
差使或酌量裁減數名之處著鑾儀衛會同內務府議奏○己卯
諭那彥成奏勘明渾水淤淀刷隄請動項估辦土埽各工一摺前

據那彥成奏永定河渾水南徙東淀直偏千里長隄恐防運道降
旨令該督於親往履勘時籌議覆奏茲據奏疏挑永定河下口此
時趕辦不及惟有將舊社家道溝隄身大加幫培並多鎮埽段以
資抵禦著照所請將見辦各工責成天津道李振翥永定河道張
泰運分別購料集夫督辦工程如有短缺草率惟該二道是問務
於端午以前普律全完工竣覈實驗收奏報所有估需工料銀三
萬六千八百五兩零卽著在水利本款內照數動撥

閏四月戊子朔諭軍機大臣等有人密陳兩淮巨梟黃玉林以儀
徵老虎頸水次爲匯聚運籌之所以湖北之陽邏江西之藍溪爲
屯私發賣之處大者沙船載數千石三兩連槽由海入江小者猫
船載百石百十成幫由場河入瓜口器械林立輓轆轉運長江千
里呼吸相通甚則劫掠屯船轉江之官鹽每次以數百引計各路

關隘俱有賄屬巡役明目張膽任其往來貲本既多黨與益眾公然立有約束於販私之外不許有劫盜客商等事以爲要結人心之計且聞該犯於大小衙門俱有勾結耳目凡有舉動無不先知上官爲屬員蒙蔽或陷於不知下僚以畏蒞偷安相期於苟免且恐釀成事端反蹈辦理不善之咎以致上下相蒙惟恐多事所獲者不過肩挑負販零夥小梟藉此爲敷陳張大之詞官弁升遷之地苟且塞責而已近見該督撫所奏以儀徵爲私梟窩踞之所請將王用賓調補是督撫等亦慮及於此王用賓前在沅陽任內勤於緝捕自係能事之員然此等巨梟聲勢已重豈縣令一人所能制服而巨梟不除又何以清鹽務而杜後患等語江南爲腹心重地此等巨梟肆行無忌地方官豈竟毫無聞見若恐查拏激變不及早翦除相率容隱是不第爲害嵯務日久養難貽患必致釀成

他變蔣攸銛接奉此旨務當不動聲色密速掩捕一面將辦理情形先行由驛覆奏惟該犯聲勢既重黨與必多江海船隻時常往來在官人役皆其耳目若稍露端倪或聚眾拒捕或聞風遠竄尙復成何事體著該督酌量情形如須藉用兵力卽當隨宜調度儻江省文武員弁於辦理此事不能得力他省文武各員內如有該督稔知其可備任使者亦卽據實奏明飭調前往總期將黃玉林一犯先行拏獲嚴究黨與盡絕根株既不得輕率債事亦不可任令潛逃懷之慎之○禁各省實缺人員赴省逗留○是月賑西藏喀喇烏蘇等處被災番民

五月辛酉河南直隸毗連十四州縣地震命加意撫恤○甲子諭御史王璋慶奏請裁革州縣白役一摺直省州縣額設官役原有定數卽使繁要州縣事務較多不能不量招散役以供使令然須

定以限制豈容影射滋弊極累閭閻若如該御史所奏山東州縣差役大縣至一千餘名小縣亦多至數百名一省如此他省可知此等白役遇事生風在官多一巨猾卽地方添一積蠹不惟鄉愚受其魚肉該管官亦何以稽察亟宜嚴行裁革前此直隸省因各州縣挂名吏役過多經那彥成奏請以八十名爲限當經降旨允准各省州縣俱應倣照辦理著各該督撫酌量州縣缺分之繁簡嚴定章程大加裁汰至繁地方差役不准過八十名其餘事簡地方以次遞減編立卯簿具報該省督撫責成該管官及該管上司嚴行稽察所有白役槩行禁革儻仍私自容留該管官漫無覺察從嚴參處如該管上司及該督撫查察不周仍屬有名無實將來別經發覺必當執法嚴懲決不寬貸○予廣東安定縣前明勦賊捐軀五品官王昌言祠祀○丁丑諭軍機大臣等蔣攸銛等奏逃

流販私帶同夥犯船隻鹽斤赴官自首情願效力贖罪一摺黃玉林一犯本係福建省逃流在儀徵等處販賣私鹽見在帶同夥犯伍步雲等八名並船隻鹽斤赴官投首情願效力贖罪據該督等奏見值兩淮亟籌靖私之時懇恩寬其仍發原配流罪責令指引緝私並將伍步雲等一併免其治罪留作眼綫等語兩淮鹺務凋敝多由私梟充斥黃玉林既熟習販私之路又多識販私之徒自願隨同官弁引拏並據淮南總散商人僉稱用以緝私定能見效官引必可暢銷情願聯名結保且前此查拏斬犯賀三虎係該犯指引拏獲久有悔罪自贖之心其情亦尙可原自無妨寬其既往予以自新但黃玉林本有應發原配流罪見在責令指引緝私卽能拏獲巨窩積梟官引得以暢銷亦止可免其流罪不得冀倖格外恩施如該犯但圖苟免一時不能立功自贖仍當從重加等治

罪至伍步雲等八名隨同黃玉林販私不記次數斤數業經畏罪投首照律應免治罪該督等見擬留作緝私眼綫如稍不安分卽當嚴行究辦惟該犯等本非善類將來應如何稽查安置之處亦當豫爲籌及毋得稍貽後患此事係屬權宜辦理朕因緝私緊要且據查明該犯等於私梟出沒路徑最熟緝捕可以見功是以姑允所請該督等務當隨時體察籌計萬全總期私梟斂戢官引暢銷不令該犯等別滋事端始於該處離務實有裨益斷不可遷就一時轉滋流弊○戊寅纂平定回疆方略成 御製序文○是月緩徵直隸磁州等三州縣地震災下忙額賦江蘇海州沭陽等二州縣水災上忙銀糧及節年漕價銀

六月辛卯禁回空漕船夾帶私鹽○蔣攸銛有疾以陶澍署兩江總督○甲午諭托津等奏會議稽察役滿書吏回籍章程一摺在

京各衙門役滿書吏並不回籍往往逗留京師招搖影射翫法營私據托津等遵旨會議章程具奏所有已滿書吏逾限不卽起程及半年不到原籍潛行來京分別革去職銜治罪司坊官分別勸懲疏縱原籍之地方官參處告退革退之吏勒限回籍五城司坊官督率總甲認真查報冒籍大宛兩縣者役滿令歸原籍其籍隸大宛者不准充當書吏至貼寫酌定額數責令該經承連環取保其有加捐佐貳等官無庸在部投供者勒令回籍直隸鄭州商販人等嚴禁包攬代捐各條均著依議行並著都察院堂官滿漢科道留心查察如有役滿逗留及地方官容留疏縱等弊隨事隨時據實嚴參懲辦不得日久視爲具文○乙未召康紹鏞來京以程祖洛爲湖南巡撫

由工部右郎遷

○丁酉以拏獲假照案內要犯加陶

澍太子少保○己亥翟錦觀以病免以李義文爲雲南按察使岫

東盟運使選

○癸卯定查禁內地行銷鴉片章程○乙巳諭昨將編修王炳瀛升授右春坊右贊善本日據文慶等具呈代奏謝恩向來升任人員其應行謝恩者例於吏部次日述旨後再行遞摺乃文慶等於旨未述下時遽行代奏於各衙門未能盡一殊屬不諳定例文慶沈岐鄂木順額吳邦慶俱著傳旨申飭○諭蔡繩祖龐煥任松宇劉東昇等以戶部捐納房貼寫膽敢私辦假照得受多贓目無法紀已極見在業已破案將該犯等拏獲自必徹底根究以儆奸徒而清積弊惟該捐生等多係受其欺騙如有知情攬捐者自應提究懲辦其實係被騙捐生一槩不必傳訊仍當遵照前旨無庸調驗假照以免拖累並著該督撫府尹等曉示各該捐生等不必暗生疑懼妄聽邪言將來定案後分晰辦理亦不致令屈抑並責成該地方官隨時查察如有猾吏奸胥藉端嚇詐勒索立即

從嚴究辦著將此旨卽行刊刻謄黃徧行曉諭俾眾咸知以杜紛
擾○乙卯以林則徐爲湖北布政使服闋也政使○是月緩徵河南汲
縣等五縣水災新舊額賦安陽等六縣雹災地震災額賦

東華續錄

道光二十二

臣王先謙敬編

臣周澗蕃恭校

秋七月丁巳諭前因兩江總督兼轄江西相距遙遠恐有鞭長莫及之勢降旨令大學士九卿會議具奏茲據托津等奏不歸總督兼轄並無格礙曹振鏞等奏請將兼轄之處仍循其舊松筠並於會議摺外另摺具奏朕詳加披閱所議均屬明晰惟江西地方武備尤爲緊要曹振鏞等查明兩江總督兼轄三省兵額幾及七萬巡撫專任江西合撫鎮標營兵額僅止一萬二千數百名除留防省城及各府州縣倉庫各標營防汛外兩鎮可調官兵不過數千名儻遇應行水陸分道並進實慮兵力不敷總督若不兼轄該巡撫必須一面具奏一面咨調鄰省官兵臨事耽延時日所關甚鉅

兩江總督兼轄原爲控制以期聯絡聲勢徵調官兵呼應較靈所有江西一省著仍循其舊統歸兩江總督兼轄毋庸另議更改○贈故休致署工部左侍郎戴三錫尙書銜予祭葬○己未移江蘇揚州營守備駐高郵改原設千總爲城守千總○修浙江東西海塘並添建塊石坦水○乙丑定外任改補京職人員不得保送倉差例○丁卯改建浙江蕭山縣西江石塘○甲戌倉場侍郎松廷邱樹棠以姑容患病屬員不行甄別降調○乙亥諭禮部奏朝鮮國王李玪差齎咨官李應信赴京投咨稱該國王世子李昊病故請照例備物遣官致祭等語朝鮮國王恪守藩封歲修職貢於屬國中最稱恭順今聞其世子病故深爲悼惜著加恩於例賞祭品之外加一倍賞給以示優卹該國王正在壯年亦不必過傷俟得有子嗣卽行奏明冊封世子承續宗祧用延國慶○丙子免江蘇

阜甯等四縣通賦○調保昌爲倉場侍郎鍾昌爲吏部右侍郎特

登額爲刑部左侍郎

由盛京刑部侍郎調

○調史致儼爲倉場侍郎楊澤曾

爲禮部左侍郎以龔守正爲禮部右侍郎

由內閣學士遷

○以吳椿爲左

副都御史

由大理寺卿遷

○丁丑調惠顯爲盛京刑部侍郎轉常文爲理

藩院左侍郎以容照爲理藩院右侍郎

由內閣學士遷

○己卯論托津等

會同刑部奏審訊蔡繩祖等私雕假印夥辦假照將已獲案犯先

行定擬一摺此案蔡繩祖龐瑛任松宇劉東昇會充捐納房貼寫

膽敢雕刻部監假印私辦貢監職銜封典文照致冒名器累月經

年得贓難以數計且敢勾串貼寫常醇等偷出案件竄改彌縫藐

法作奸莫此爲甚見經托津等訊明分別定擬均屬法無可貸原

未便稍稽顯戮惟案內尙有應須查訊之處若將該犯等全行處

決轉恐有不實不盡蔡繩祖龐瑛先行處斬派長齡戴敦元前往

監視行刑並傳集六部書吏各數人前往環視俾共知儆懼任松
宇劉東昇二犯著照擬斬決暫留備質一俟無可質訊奏明卽予
處決常醇著絞監候秋後處決趕入本年朝審情實辦理至戶部
捐納房司員既失察貼寫私辦假照又於該犯等句串書吏偷橐
扣換漫無覺察迨假底捐生加捐率據偷改橐件批准並不詳查
照簿庫收卽有各省送到身家清白冊結亦從不覈對以致該犯
等肆行無忌見派湯金釗等詳查橐案俟查對明確與失察之該
堂官及各該衙門應議各員再降諭旨分別懲處○壬午諭朝鮮
國久列藩封最爲恭順天朝每於懷柔之中曲示體恤之意此次
派往正副使務宜恪守舊章不准於例外收受儀物該使臣差竣
回京路經奉天山海關著該將軍監督等留心查察如於正禮外
多帶儀物卽據實奏參毋稍徇隱○定京控案件取具原告切結

例○是月緩徵直隸礪州等九州縣地震災新舊鹽課霸州等十州縣水災雹災新舊額賦並貸倉穀

八月戊子諭軍機大臣等據張井奏確勘歸江各河道情形年來淮水歸海之路不暢每遇來源極旺之時若不將山盱各壩全開則歸江各路難以分減盛漲下游多被淹浸請於揚糧廳東岸八塔鋪及商家溝二處各斜挑一河匯流入江可以分減漲水又請將揚糧廳境內芒稻河東西兩閘拆除挑挖淤灘可抵新開一河之用等語淮水去路不暢自應早籌宣洩茲據該河督確勘歸江各河道情形請將揚糧廳境內之芒稻河東西兩閘全行拆除再加挑深丈餘並將引河抽挑增寬河面連金灣四壩挑挖淤灘可以抵閘新河一道不至多用帑項著該河督即將河庫存項於霜降後派員趕辦無庸另請錢糧俟明年試放後如果減水下注歸

路暢消卽無須再關新河以歸樽節○癸巳諭軍機大臣等陶澍
覆奏兩淮鹺務一摺兩淮鹺務敝壞已極原不止私販一節卽以
私販而論亦不止黃玉林一起前此准令黃玉林效力自贖原係
權宜辦理若因有自首免罪之條遂將販私之人紛紛招集成何
政體且見在黃玉林等一起陶澍等已不能妥爲安置儻再有心
招致日積日多又將如何安插黃玉林一犯本有應發原配流罪
其夥犯伍步雲等八名隨同販私不記次數斤數亦有應得之罪
見已准令指引緝私卽能拏獲巨窩積累官引得以暢銷亦止可
寬其既往不得冀倖格外恩施卽入伍食糧亦斷不准行如但圖
苟免不能立功自贖仍當從重加等治罪陶澍等務當隨時體察
籌計萬全斷不可遷就一時遇有投首者濫行收納使奸徒無所
倣畏儻辦理未能妥協於鹺務既無裨益轉致養癰貽患別滋事

端陶澍等自問當得何咎懷之慎之至商人既充總商卽當一體
辦運若並不辦運復藉辦公爲名攤派散商所獲之利轉加於辦
運者數倍乘機壟斷不可不嚴行飭禁該處總商鄒同裕鮑有恒
據陶澍奏均不辦運著卽行革退不准暗中影射身後辦事陶澍
等卽督飭運司另招股實之商充補並明定章程剔除浮費以肅
嵯政○丁未移福建漳州左營守備駐赤湖並添撥弁兵換防○
庚戌命蔣攸銛來京供職實授陶澍兩江總督兼署江蘇巡撫○
諭兩江總督陶澍看汝人爽直任事勇敢故畀以兩江重任汝當
益勵才猷實力整理膺封疆重寄者勿避嫌怨勿憚勤劬自不待
言矣然當今之世憲章具在法令森然若能大法小廉奉行以實
不以文何患政事不理百姓不安乎無如世風日下人心益澆官
不肯虛心察吏吏不肯實意恤民遇事則念及身家行法不計及

久遠朕所懼者在此所恨者亦在此欲求一堪膺重寄者不可多得河工鹽務均係兼轄尤當實力講求破除一切積習漸復舊規曰如何而能若是曰在得人毋忽毋忽○辛亥追封順治九年湖南陣亡定遠大將軍和碩敬謹親王尼堪爲和碩莊親王○以奕紀張麟俱爲內閣學士兼禮部侍郎銜奕紀由乾清門侍衛遷張麟候補內閣學士○以徐鏞爲順天府府尹吳邦慶爲貴州按察使由少詹事遷○壬子申諭各督撫提訊上控案件○調盧坤爲江蘇巡撫以朱桂楨爲廣東巡撫命吳邦慶以三品銜署漕運總督調李文耕爲貴州按察使以趙盛奎爲山東按察使由光祿寺卿遷○是月加贖湖北監利等四縣水災緩徵山東濟甯等二十三州縣衛水災旱災湖北江陵監利二縣低窪田新舊額賦

九月丁巳諭前因各省京控咨交案件提解逾限各員惟江蘇兼

奏請旨交部議處安徽彙奏咨參其餘各省係定案時隨案咨參辦理兩歧降旨交吏部明定章程改歸畫一茲據奏查明各省京控咨交案件前於嘉慶十五年經都察院會同步軍統領衙門奏准統計一年咨催兩次彙參兩次並令該督撫每屆半年詳查逾限各案將承審各官開列揭參交部查取職名議處久經定有章程惟各省案件多寡不同以致辦理兩歧請飭一體照例遵辦嗣後各該督撫府尹均將京控咨交逾限未結之案每屆半年彙奏請旨交部議處一次以歸畫一俾承辦各員咸知儆畏至向例承審遲延與提解遲延處分輕重懸殊並著各該督撫府尹嗣後每屆半年彙奏之期確切查明如係承審遲延卽行據實指參不得槩以提解遲延爲詞致啓避重就輕情弊○戊午諭軍機大臣等本日據楊遇春由六百里加緊馳奏據喀什噶爾等處大臣咨報

喀什噶爾有安集延賊匪撲入卡倫與官兵打仗滋事幫辦大臣塔斯哈追擊至明約洛地方遇伏陷歿並將帶兵策應之副將賴永貴一併被困勢甚危急葉爾羌亦有不靖等語回疆各城戡定未久乃安集延回匪復敢入卡滋事並傷陷大臣官兵見喀什噶爾嬰城守禦勢在危急葉爾羌亦有不靖情形阿克蘇等各城兵力無多且尙須防守本境地方斷難兼顧自應調集內外官兵前往台勒以期迅就肅清伊犁烏魯木齊以及喀喇沙爾所轄之土爾扈特和碩特等處官兵相距喀什噶爾葉爾羌等城較近業經降旨飭令玉麟容安成格薩迎阿等卽照該處所調兵數各一二千名派員迅速馳往救援琦善選調四川官兵三千名馳赴肅州並令固原提督楊芳甘肅提督胡超迅速出口一路迎探情形至阿克蘇再行相機進剿所有挑帶各鎮官兵及西安滿洲營馬隊

一切事宜均著照該督所請行陝甘總督已降旨令鄂山馳驛前往署理著楊遇春將應需官兵糧餉一切事宜與藩臬兩司籌商料理後卽挑帶督標官兵一千八百名並委蘭州道圖明額等馳赴肅州卽在彼駐紮妥辦後路事宜無庸出關其軍需銀兩著卽在甘肅藩庫封貯銀內先行動支應用○以徐忻署陝西巡撫阿勒清阿署山西巡撫

由刑部左侍郎署

○己未以楊遇春爲欽差大臣○

命都統哈琅阿赴回疆協勦○

召王楚堂來京以鍾祥署雲南布

政使

前任山東布政使

○癸亥諭軍機大臣等前據玉麟奏喀什噶爾逆

夷犯卡勢甚危急已飭領隊大臣額爾古倫等帶兵前往並飛咨

提督哈豐阿管領烏嚕木齊官兵救援當降旨令玉麟容安均在

伊犁嚴密防範無庸前往本日又據奏容安已督兵前進自己加

緊進行與哈豐阿先後抵阿克蘇會同長清相機妥辦惟是一切

防守進剿事宜務須和衷商榷不可各執己見致有疏虞○甲子

那清安丁憂以寶興署左都御史

由戶部右侍郎署

○免湖北監利等五

州縣衛水災額賦十分之一○乙丑諭軍機大臣等常德等奏偵探竄入喀什噶爾賊匪名目並烏什阿奇木伯克等懇請捐辦烏拉馬匹一摺據稱烏什卡內五品頂帶藍翎布噶特比庫曲圭並阿奇木伯克木薩差派六品頂帶回子多列特金頂莫洛雅和普克里木出卡探得霍罕賊匪頭目安集延愛散木薩前次從逆之喀什噶爾白帽回子伊閏察克等勾結布噶特比阿坦台汰劣克沙提伯克斯底克帶領各變曼布噶特等入卡滋擾卡外仍陸續糾約尙無從小路直撲烏什確信等情布噶特比庫曲圭等均著該大臣等一面傳旨獎勵其如何加恩之處卽奏明請旨又據奏探得喀什噶爾英吉沙爾二城白帽回子從逆者甚多烏什雖有

白帽回子均甚安靜該大臣等務須嚴密稽察激勵兵回妥爲防範至阿奇木伯克木薩率領阿渾及眾伯克等稟稱伊等世受深恩斷不能從逆並率同海孜伯克伊薩克巴吉格爾伯克伊雜克明伯克胡魯板等懇請除前次捐辦烏拉馬二百匹之外情願再捐六百匹等語情甚可嘉著該大臣等卽飭阿奇木伯克木薩將所捐烏拉馬六百匹令其在城附近牧放以備烏什馬隊及偵探官兵輪流騎用○丁卯命大學士公長齡爲欽差大臣馳往新疆督辦軍務○己巳伊犁將軍玉麟等奏南路逆謀已逞恐賊料我兵盡數南行萬一乘虛北至關繫匪輕批此言是分布亦好又奏徵調勦辦南路官兵之外應請另簡派大員管帶精兵二萬出關後分路直來伊犁卽由伊犁出卡先滅塔什坦伯克部落直下吹塔拉各城進勦霍罕與南路同時夾擊俾腹背受敵庶可淨掃賊

氛批此計早在朕心思維已久如爾等所議乃攻心之計然可言而不可行試思卡外步步非吾土處處非吾人各布嚙特愛曼必應厚加撫恤糧餉必應充足後路必應接濟臺站必應安設兵餉不知幾何矣卽獲全勝而歸在霍罕可爲落魄而日後奸回中如霍罕者又能保其必無乎卽欲大彰天討永定邊疆亦必籌一萬全之策若以二萬師干成此大舉或前或後稍有疏失汝二人雖萬死不能償誤國之罪也朕非柔懦畏難乃審天時度人力之苦心也○癸酉諭軍機大臣等蔣攸銛等奏查出投首效力梟犯復圖私販審明定擬一摺前經降旨令蔣攸銛等緝獲儀徵縣私梟黃玉林嗣據該犯帶同夥犯並船隻鹽斤赴官投首經蔣攸銛等奏請寬其既往責令指引緝私效力贖罪朕卽覺其辦理未善疊經降旨查詢無非敷衍具奏因兩淮亟需靖私姑允所請原係權

宜辦理茲據蔣攸銛等奏該犯故智復萌於伊跟人懷內拔出寫給隨同投首之伍步雲等書信有恐人占去老虎頸馬頭致伊進退無路屬令仍回儀徵守定巢穴之語見已審訊明確擬發新疆蔣攸銛復片奏請將該犯交陶澍卽行處絞不知是何居心該犯前因發遣遇赦後復犯罪擬流逃回販私乃准令自贖後仍不知悛改反覆無常實屬自外生成若不明正典刑必致奸徒藐法爲害地方益復無所顧忌黃玉林著卽行正法以示懲儆蔣攸銛於黃玉林投首率行奏請迨屢次降旨詢問並不據實陳明見在訊明罪狀旣與陶澍聯銜具奏將該犯改發新疆復恐其到配潛回致貽後患請卽行絞決單銜密奏朕綜理庶政光明正大一秉至公蔣攸銛辦理此案事前旣無主張事後又復苟且以大學士膺封疆重寄者固應若是耶著交部嚴加議處福森身任鹽政於鹽

梟投首並不慎重詳查輒行奏請免罪王鳳生明知私梟充斥不
卽實力查拏轉出示招致投首詳請具奏辦理均屬謬誤之至福
森王鳳生著一併交部嚴加議處陶澍於黃玉林投首會銜具奏
屢次降旨訊問又不確切查明咎亦難辭著交部議處○王定柱
以病免調孔昭虔爲浙江按察使以楊名勳爲陝西按察使由廷
道○乙亥 上閱火器營兵○丁丑諭蔣攸銑前於私梟黃玉林
投首率行奏請免罪迨屢次降旨詢問並不據實陳明嗣因其故
智復萌訊明罪狀旣與陶澍聯銜奏請改發新疆復恐其到配潛
同請交陶澍將該犯卽行處絞單銜密奏蔣攸銑辦理此案事前
旣無主張事後又復苟且經吏部照溺職例議以革職實屬咎有
應得姑念其歷任封疆宣力有年平日辦事尙無大誤著革去大
學士加恩以侍郎降補福森身任鹽政於私梟投首並不慎重詳

查輒行奏請免罪署運使王鳳生明知私梟充斥不卽實力查拏轉出示招致投首詳請具奏辦理均屬謬妄之至本應照部議革職惟該二員在任未久福森王鳳生俱著加恩改爲降四級調用陶澍於黃玉林投首會銜奏請免罪屢次降旨詢問並不確切查明咎亦難辭念其前在巡撫任內究無管理鹽務之責僅係隨同具奏著加恩改爲降四級留任○召徐忻來京以顏伯璽署陝西巡撫

由直隸布政使署

○戊寅璧昌等奏賊由喀什噶爾潛來葉爾羌東

北奎里鐵里木回莊窺伺分派官兵回民趕至莊前相持一晝夜旋有賊衆撲回漢兩城我兵併力擊斃數百名賊勢潰散得旨嘉獎賞璧昌副都統銜常豐三品卿銜花翎俱交部議敘○命盧蔭溥爲體仁閣大學士以李鴻賓協辦大學士仍留兩廣總督任調湯金釗爲吏部尙書王引之爲禮部尙書以潘世恩爲工部尙書

朱士彥爲左都御史蔣攸銛爲兵部左侍郎○辛巳諭軍機大臣等據玉麟奏接據長清信稱喀什噶爾英吉沙爾固守尙存此次賊匪皆前次從逆之博巴克爲首葉爾羌回眾尙無從賊之心又烏什報稱上屆從逆阿奇木薩達特之兩子暨明伯克之弟胡達巴爾底等俱係賊目並布魯特比遣人至喀什噶爾邊外探得霍罕伯克並未親來先遣愛薩依閔察克率眾勾結阿坦台汰劣克入卡攻城未破賊目玉都克素皮帶人在樹窩子潛匿令賊匪往阿克蘇探聽大兵信息其餘各賊均在喀什噶爾新城附近回莊居住因攻城未能得手遣人至霍罕求援阿坦台汰劣克復行出卡仍回薩雅克愛曼等語此次喀什噶爾英吉沙爾被逆賊滋擾先後調派官兵不下三萬有奇原欲痛加剿辦永靖邊陲惟逆犯博巴克阿坦台汰劣克等本屬張逆餘黨倖逃法網狡誦異常若

大兵經臨聞風先遁追兵撤後又復前來實屬不成事體必應大加懲創以期淨絕根株著長齡於途次面晤楊遇春到軍營見楊芳總須從長計議務將博巴克阿坦台汰劣克及愛散伊閱察克胡達巴爾底等犯悉數就擒應如何截其歸路毋致竄逸熟籌制勝之策以杜後患儻該逆犯等竟已遁逃尤當相度機宜探明藏匿確切地方如須加以兵威前往追捕或懸賞格購緝設法擒渠方爲不虛此舉該逆匪等無論由我兵擒獲及各夷回縛獻不得就地遽行正法俱著解京訊辦若該賊匪逃竄卡外勢有難行之處亦毋庸徒託空言仍歸無益反致爲所輕視長齡等務當通盤籌畫計出萬全以副委任○癸未命顏伯璽馳往肅州會辦軍需以史譜護陝西巡撫由布政使護理○是月賑直隸磁州等三州縣地震災四川彭城等二縣水災緩徵陝西咸甯等十五州縣歛收倉穀

奉天承德等五州縣旱災湖北監利等六州縣衛水災新舊額賦
長蘆上年水災鹽課

冬十月乙酉朔諭軍機大臣等前以該犯玉素普在布噶爾地方
種地念經度日是以未經搜捕此次竟敢糾約回夷入卡逞逆占
據回城顯係倚恃和卓後裔煽惑愚回復敢書寫回字逆信妄思
勾結見據阿布都爾滿查獲送信回人究出逆情業已降旨加恩
以爲忠順者勸玉素普父子爲逆種禍根一日不除則邊疆終未
能永靖該都統等當設法擒拏斷不可使竄逸無論何人臨陣生
擒或計令縛獻必立加懋賞此時當以合兵進剿長驅直入其圍
自解如能內外夾攻尤可聚而殲旃朕計日以盼捷音之至○兩
江總督陶澍奏兩淮鹽梟情形不一有回匪僞匪與非匪而暗地
夾私者前准黃玉林投首原欲資其引緝以杜回僞商私之弊與

蔣攸銛札商先將混冒投首希冀多得工食之餘眾遣散再將該犯嚴行拘束諒必不安思遁因而治之可以示懲黃玉林果因發營管束過嚴寄信同首之人圖遁當將書信搜獲經蔣攸銛發交江甯藩司及該府審辦其同來之伍步雲等八人於六月在儀徵引緝私梟十二名又於八月在高郵緝獲巨梟一起惟黃玉林既經懲辦此八人見亦收監擬一併發遣以絕根株至辦理投首由署運司王鳳生出示在先原其意在急收緝私之益平時亦無偏見儻將來果有未妥自當另請簡放斷不至稍事姑容報聞○葉爾羌辦事大臣璧昌奏追捕舒克舒回莊賊匪至科依喀察爾地方槍斃布魯特十餘名將所搶人畜全行奪回餘賊逃竄得旨嘉獎○戊子諭朕聞劉彬士性情多疑遇事游移不決降旨令孫爾準於前赴浙江查閱營伍時就近密訪該撫聲名辦事若何據實

具奏茲據奏劉彬士遇有應委應調缺出既經懸牌委調後旋又
換人率以爲常於屬下情形未能諳悉信用紹興府南塘通判吳
嶢不赴本任歷署繁缺知縣近更常住省城盤踞招搖致滋物議
等語是劉彬士辦事不能決斷又復信用非人豈能勝巡撫之任
著來京以三四品京堂候補○諭軍機大臣等王麟奏續接葉爾
羌獲勝情形並差探和闐回情安戢該處至葉爾羌臺路尙通其
草地一路暨阿克蘇軍臺亦皆安謐又葉爾羌所獲活賊薩底爾
阿比爾等各供稱玉素普已占據回城博巴克充僞阿奇木派令
賊目薩木薩克及胡爾班素皮察克等分擾英吉沙爾葉爾羌二
城玉素普之外甥推拉罕及莫洛邁瑪底敏愛散巴圖魯率眾圍
住喀什噶爾新城等語此案著名逆賊妄思句結爲奸深堪痛恨
前疊經降旨諭知長齡及帶兵各大員所有玉素普博巴克等按

名擒獲將來大兵進剿必須搗穴擒渠務將前後指出逆首及各賊目悉數就擒斷絕根株毋使一名漏網致貽後患至玉麟奏霍罕在吹搭拉地方築城一節已諭令玉麟派委妥員前往密查著長齡於軍務辦竣後將霍罕所築各城情形確實訪查具奏○以富呢揚阿爲浙江巡撫

由江西布政使遷

○乙未諭軍機大臣等玉麟奏

探得逆酋是玉素普及其一子尙有張格爾在布噶爾所屬布哈拉地方所生一子年已二十不知其名霍罕從逆者依薩木薩胡什伯克布噶特從逆者阿坦合汰劣克冲莫得特奇布勒得依並糾結巴侯斯希布察克冲巴噶什等愛曼人衆說有七萬人到喀什噶爾打仗塔什坦伯克雖未同往卻將搶得哈薩克之馬匹幫助賊匪此外布噶特不肯從逆者尙多喀什噶爾黑帽回子多不從逆有逃往阿克蘇者其白帽回子亦不盡從等語逆回玉素普

父子前經獲賊邁瑪特供明在喀什噶爾七里河子回莊目覩惟
張格爾止有一子名布素魯克今據鄂勒吉拜所聞張逆先在市
哈拉生有一子見已長大是否屬實著確切訪查如果隨同玉素
普進卡滋事正可乘機捕獲著長齡迅速行知軍營帶兵大員將
玉麟所奏逆回家屬並著名逆匪依薩木薩等犯設法擒拏毋任
聞風逃遁前據長齡奏稱喀什噶爾黑帽回子誠心恭順今玉麟
訪察情形與長齡面奏之言相符此次黑帽回子戮力同心多不
從逆甚屬可嘉著長齡飭知帶兵各員務須加意撫恤毋許兵丁
稍有騷擾該回子等如能奮勉出力著卽奏明加以恩賞以示朕
勦逆安良之至意○仍授長齡爲揚威將軍命哈琅阿楊芳參贊
軍務○丁酉諭前因喀什噶爾馳報有逆回入卡滋擾新城被圍
蔓延英吉沙爾該處堅守孤城待援甚急當卽調派伊犁官兵民

勇及烏魯木齊並喀喇沙爾所屬土爾扈特等處官兵星馳援救
疊經嚴催帶兵大員無論何人先到阿克蘇卽會商長清趕緊進
發毋得觀望致誤事機乃本日容安等奏稱伊犁官兵民勇四千
五百名已抵阿克蘇以之進剿則有餘以之分布烏什阿克蘇並
前路進剿則不足見飛催烏魯木齊及土爾扈特官兵俟到齊分
撥防守容安再會同哈豐阿等分隊進剿等語覽奏竇深憤懣伊
犁官兵民勇已有四千五百名全抵阿克蘇軍聲大振必當迅速
進發能早到一日卽得一日之用若猶謂兵力不厚亦應先行起
程馳往葉爾羌一帶以壯聲威不日烏魯木齊等處官兵相繼而
至會合赴救卽可解圍殲賊况葉爾羌已獲勝仗軍臺廓清道路
無虞梗阻乃容安等觀望遷延坐視不進捨二危城於度外是何
居心至稱分布烏什等處防堵更不成話試問飛調援兵因爲何

事且援兵未到之前烏什阿克蘇未能防守耶容安以帶兵大員任意宕延怯懦無能著交部嚴加議處長清於伊犁官兵到後私心自用止知防守阿克蘇並不催令前進亦屬遲誤著交部議處以示懲儆○戊戌以失察假照降顧皋四品頂帶休致鑄黃鉞等級有差○庚子諭軍機大臣等陶澍奏遵旨將鹽梟黃玉林正法並辦理大槩情形一摺黃玉林一犯業經正法其隨同投首之伍步雲等八名於黃玉林復圖販私是否知情同謀必應嚴行根究該犯等見已提至江南省城收禁委員審辦著該督於回署後親提各犯審訊明確按律定擬具奏至老虎頸地隸儀徵爲淮南監掣捆鹽之場兼係泊船馬頭據該督奏該處舟航櫛比時有私鹽船隻雜出其中其代爲雇覓掩藏抽分微利謂之外代黃玉林外尚有回俦各匪在彼爭占等語此等匪徒見在雖因懲辦黃玉林

後四散逃走而利之所在已散者難保其不來不可不實力查拏以淨根株該處情形據奏不在梟徒之冒法販私而在小民之情迫食私且販私者不盡在梟徒而商廝商夥與運鹽之江船夾帶實甚見交冬令若再不稱掣行運則此細鹽之夫役數萬人何從得食尤應籌度善策妥爲經理陶澍身任兩江總督兼轄鹽務責無旁貸於該處私梟應解散者卽當設法解散應緝拏者當飭屬緝拏總使私梟歛戢鹽務日有起色方爲不負委任至老虎頸及丹徒江都扼要之區應如何移駐官兵彈壓之處著該督酌量情形詳細籌議具奏○辛丑諭容安帶領伊犁官兵民勇四千五百名行抵阿克蘇卽使酌留一千名防守各處尙有三千五百名之多且各路援兵接續趕到儘可先赴葉爾羌一帶以壯聲威俾喀什噶爾英吉沙爾兩處賊匪聞風震懾其圍自可立解卽如葉爾

羌防守兵力無多尙能大獲勝仗今擁此重兵觀望不進實屬怯懦無能況據容安等奏委員前往大路一帶地方偵探齊蘭臺以南並無賊蹤是前途軍臺廓清道路無虞梗阻正可乘時進發若云阿克蘇等處尙須留兵防守何以援兵未到之前阿克蘇烏什皆安堵如常調度乖方藉詞延宕遲誤之咎實無可辭容安著暫行革職將來喀什噶爾英吉沙爾二城獲保安全或可施恩另賞差使若該二城日久力竭援兵不至容安必當從重治罪伊所襲子爵著容照承襲長清著照部議降三級調用仍留阿克蘇效力暫停開缺俟軍務告竣再行降旨○癸卯諭軍機大臣等常德等奏烏什夷回安靜偵探喀什噶爾賊勢情形一摺據奏探報喀什噶爾英吉沙爾二城見雖被圍該城官兵守禦甚固霍罕安集延賊目明伯克愛散等假玉素普和卓之名煽惑勾結而從逆者多

係上次附逆倖逃法網之犯及白帽回子情關回戶見今被偏從
逆回衆均盼大兵前往救援其阿坦台汰劣克沙提伯克斯底克
等均已先後出卡等語朕料該處情形亦必如此容安帶兵不肯
急速前進甚屬可恨已降旨將容安革職前已疊諭胡超哈豐阿
等到彼迅速進兵又諭哈琅阿楊芳趕緊馳往援剿此時各路援
兵雲集無難剋日廓清常德等當激勵兵回嚴密防堵毋得稍有
疏虞○乙巳諭本月十三日朕進宮時大阿哥因病未痊住圓明
園皇后亦未進宮昨據該總管太監奏儀親王於十八日前往看
視徑入福園門至大阿哥所內當時值班官兵及太監等攔阻不
聽等語國家體制門禁森嚴不准擅行闖入卽如悼親王惠郡王
係大阿哥之叔及內廷行走之慶郡王縣愍定親王奕紹自必俱
爲繫念然亦止能差人探問不敢自行擅入乃儀親王率行進門

不聽阻止殊屬不合想係年老神瞽故習未悛伊子縣志不能從旁勸阻甚屬非是其宗人府右宗正及正白旗漢軍都統俱著開缺所有圓明園駐班之阿爾邦阿等並該門值班官兵及太監等不能力阻俱有應得之咎此次姑免懲辦嗣後務當遵照門禁章程慎重恪守如再有似此擅入禁門之事定當分別嚴懲不貸○丁未諭容安等奏接據葉爾羌信稱賊匪滋擾急待援兵酌量派兵由和闐進援及分撥阿克蘇烏什防守以待胡超等商勦一摺覽奏竇深憤恨前經疊降諭旨令帶兵各員無論何人先到阿克蘇與長清會商卽行進發不可因前途軍臺已斷稍有耽延致滋貽誤乃容安等於伊犁烏嚕木齊等處官兵行抵阿克蘇後並不迅速起程前進嗣接璧昌來信以葉爾羌有三百馬賊直撲回城當派官兵矛隊二百名令臺市把總羅延帶領民勇二百名兩路

出隊賊始遁去又一股賊匪約二百名轉向東南搶伯什阡回莊此莊距和闐坡斯坎木頭臺三十里若被賊阻斷則與阿克蘇文報不通須速行發兵二千由和闐草路前往即可安保等語前據長清等奏伊犁頭二三起官兵於九月初一日至初七等日抵阿克蘇容安等奏官兵民勇係九月十二日全行到彼見據奏烏嚕木齊土爾扈特兵丁於九月二十二日至十月初一日陸續趕到如果及早進兵先赴葉爾羌一帶以壯聲援何至該莊尙有賊來滋擾乃於兵到一月有餘之久且已接壁昌告急之信猶復觀望遲疑坐擁八九千兵尙云兵力較單恐賊計誘我大兵深入試思以大兵進至葉爾羌何得謂之深入實屬怯懦無能藉詞延宕且據奏稱哈豐阿孝順岱定期前往和闐察看情形再向葉爾羌進發葉爾羌情形如此緊急竟置諸度外尙欲先赴和闐探無賊蹤

再行援勦似此畏葸不前喪盡天良必應嚴行示懲以儆延玩容
安前已降旨革職著卽拏問交長齡派員押解來京訊究長清吟
豐阿俱著交部嚴加議處○諭雲南巡撫伊里布由驛馳奏一摺
據稱伊前於滇省永北大姚軍務曾經帶兵茲聞喀什噶爾等處
有回匪入卡滋事請派令馳往隨同統兵大員勦辦等語同仇敵
愾固係人臣分所當然但滇省距京師程途幾及萬里京師距喀
什噶爾又有一萬餘里之遙該撫遠在滇南於回疆外夷不靖之
事不能悉其梗槩輒自謂曾辦永北大姚軍務卽可勦撫邊陲師
心自命視爲易易從前雲南永北廳野夷糾衆擾及大姚係因該
土司將地土典給漢民耕種起釁與喀什噶爾等處夷匪滋事情
形迥不相同何得以此比較乃該撫因尋常帶兵安撫卽自恃身
經行陣不度德不量力妄行馳奏徒勞驛站實屬不知輕重冒昧

糊塗已極伊里布著先行拔去花翎交部嚴加議處○戊申諭軍機大臣等阮元等奏越南國王咨稱內地縣官擅擊夷目委查並非彼境應行照會該國一摺雲南建水縣之禮社江以外巴發河以內六猛地方自國初以來投誠內附久隸版圖乾隆年間安南國王屢次以申畫疆界爲詞均經駁斥嘉慶年間越南國鎮目傳詞各猛意圖越占復經奏明駁斥並將各猛各寨開寫清單照會該國恪守舊規茲該國來咨一稱刁國麟被擊監斃一稱刁政定等在昭晉州被擊據該督等查明係內地所轄各猛應行治罪及拘訊之人該國佯爲不知干預查問自係故智復萌先行嘗試以爲罩占猛地之端內地與外夷毗連地方界畫分明絲毫不准占越猛賴等六處久歸內地管轄納糧請襲且有土練兵丁數千安設多年豈容該國妄生覬覦借名罩占該督等擬錄敘舊案行文

曉諭直斥其非必應如此辦理著即將乾隆嘉慶年間疊次舊案
詳晰行知該國王曉以大義諭令懷遠舊規不得攙越滋釁邊圉
交界最爲緊要該督等務當嚴行檄諭俾知恪守界址斷不可令
外夷妄啓冀倖有違天朝體制至內地與該國接壤處所遇有查
拏人犯誠恐書役等藉端騷擾不可不隨時約束此係內地應行
查禁之事嗣後著嚴飭所屬凡遇傳提人證務當指實確查秋毫
無犯儻有意滋擾激成事端以致生釁外夷必當從重治罪決不
寬貸○諭據慶保等奏查有英吉利國大班喇嘛攜帶番婦來至
省城到公司夷館居住又該夷商由船登岸坐轎進館並因訛言
有派兵圍逐之說心懷疑畏通信黃埔灣泊各夷船令水手百餘
人乘夜將砲位數座及鳥槍等件收藏船內偷運省城夷館經慶
保等密飭文武員弁留心防範彈壓業將鳥槍搬去水手散回其

破位尙藏放夷館門內並況洋商代求稍寬時日再令番婦回澳
見在嚴飭速將番婦押往澳門破位運回各船妥爲辦理等語向
例番婦不准來省居住夷商不准坐轎進館其攜帶鳥槍破位止
係外洋備防賊盜尤不得私運進城慶保等務當嚴切曉諭令其
遵守舊章嗣後不得稍有違犯致干禁令儻仍敢延抗卽當設法
驅逐示以創懲亦不可稍存遷就總須酌籌妥辦於懷柔之中仍
不失天朝體制方爲至善○壬子轉賈允升爲兵部左侍郎以張
麟爲兵部右侍郎由內閣學士遷○予故兵部左侍郎蔣攸銑祭葬如尙
書例○是月賑直隸大城文安二縣災民給安徽蕪湖等五州縣
衛口糧貸黑龍江等三處旗民倉穀甘肅皋蘭等十一州縣貧民
口糧緩徵直隸文安等三十一州縣湖北漢川等十縣衛安徽蕪
湖等二十八州縣衛浙江仁和等九縣江蘇上元等四十三州廳

縣衛湖南武陵等五州縣甘肅皋蘭等十四州廳縣水災旱災雹災新舊額賦齊齊哈爾等四處旗民逋款展緩河南杞縣等五縣逋賦

十一月丁巳諭前因七品以下人員違例僭用素金帽頂經大學士九卿議定章程降旨嚴申例禁茲據給事中陶廷杰奏違例僭用者見尙不免朝廷制用頂帶章別等威何得濫行僭越况經降旨申諭並責成科道等據實糾參豈容視爲具文不加察劾朕思吏部月選官驗看時每次遴派各部堂官八員科道各四員其驗看官內有八九品未入流等項人員如違例用素金頂者著卽指名嚴參嗣後若再有七品以下人員僭用素金帽頂者並著科道等隨時糾參按律懲處以重名器○庚申璧昌等奏葉爾羌境內賊匪勾結情蘭回子在附近驅逐本地回子搶擄馬匹有馬賊五

六百名步賊六七千人全聚東北二十里之內亮噶爾屯紮已斷

兩城臺路經阿奇木伯克阿布都爾滿等將通大河渠道上游空

開使賊不能近城十月初七日派卽補副將任貴邦守備黃泰邵

蕙王琰把總羅延分隊迎勦阿布都爾滿帶領伯克等亦出城分

撥迎敵賊踏水而過將及南岸任貴邦奮勇當先殺賊三百餘級

賊首先逃隨後跟追四十里外並將鍋帳旗幟等件奪獲得旨嘉

獎賞賚有差○辛酉定欽派大臣揀選五城兵馬司指揮副指揮

吏目例○丙寅楊健以年力就衰並辦理公事隨聲附和降三品

頂帶休致以楊懌曾爲湖北巡撫由禮部左侍郎遷○丁卯定戶部防範

假文及覈對冊稟章程○轉龔守正爲禮部左侍郎以桂齡爲禮

部右侍郎出左副都御史遷○允賀長齡乞假省親以陸官爲江甯布政

使服闋河南○壬申 上詣 大高殿祈雪○癸酉諭松筠等奏

查訊徐炘被參各款一摺解任山西巡撫徐炘前經御史葛天柱奏參各款茲據松筠等奏該御史所參查閱營伍家丁勒索及題升調補委署各款任意營私等款查明均無其事其門丁顧鴻如之服役人劉泳成已將屍棺開驗復提集人證詳訊供情實係因瘋自戕並無謀斃情事惟徐炘當時既不派臬司相驗訊辦又不專摺奏明致滋物議殊屬錯謬其秋審過堂時徐炘之家屬在堂後隔簾看視管教不嚴亦咎無可辭徐炘著交部嚴加議處卽行來京聽候部議○壬午嵩孚緣事降副都統銜爲喀喇沙爾辦事大臣以盧坤爲湖廣總督調程祖洛爲江蘇巡撫蘇成額爲湖南巡撫以祁墳爲廣西巡撫戴宗沅爲刑部右侍郎由河南布政使遷○癸未以阿勒清阿爲山西巡撫調鍾昌爲刑部右侍郎奕經爲吏部右侍郎那丹珠爲工部左侍郎常文爲盛京兵部侍郎以嵩惠爲

理藩院左侍郎

由左副都御史遷

○調林則徐爲河南布政使以額騰伊

爲湖北布政使調夏修恕爲山西按察使降徐忻爲湖南按察使

前山西巡撫

○是月賑河南安陽等三縣地震災給江西廬陵縣水災

修屋費緩徵安徽貴池等三縣衛江西南昌等十六縣衛水災河南武陟縣蠲荒地賦江蘇青村袁浦二場水災鹽課甯古塔旗民通賦

十二月丙戌諭軍機大臣等璧昌等奏葉爾羌近日賊匪情形並救援官兵到城一摺據稱十月二十九日西路科科巴熱特營盤有賊匪千餘騎自英吉沙爾前來撲擾將出敵之商伯克玉素普等四人裹去小回子等膽怯驚散該賊復暗會城東賊匪及從逆情蘭賊眾於三十日到城屯於南北回眾之後當卽飛差兵回往迎援兵整隊備戰十一月初一日賊眾繞城而攻經璧昌調派官

兵出城接應常豐在城上督率調撥槍礮打死賊匪甚多南關外
又有賊匪竄入復勦殺十餘名餘皆竄逃我兵民等僅陣亡四名
受傷五名初三日賊眾徑撲回城經官兵伯克等用槍礮打死五
十餘名連日賊眾退聚西南附近回莊屯紮以致臺路文報不通
正在危急適哈豐阿孝順岱帶兵前來於初五日由城東南回莊
直奔賊營殺賊無數生擒六十餘名餘賊拔營西竄壁昌等卽調
東門外紮隊官兵接應復搜擒數十名搶獲槍矛馬匹鍋帳等物
追殺賊蹤已逃過喀拉布扎什頭臺隨卽合兵一處公同計議等
語此次葉爾羌復有賊匪滋擾經該大臣等卽時勦散哈豐阿等
援兵已到見議先追至西路喀拉布扎什頭臺戈壁迤西英吉沙
爾交界地方暫爲紮營相機再進其東路愛吉特虎頭臺賊匪自
必聞風膽落不敢再來至從逆情聞回子甚屬可惡前已諭知長

齡到阿克蘇後派員查明痛加勦洗該大臣等務卽諭令阿布都爾滿設法先行招集分別拏獻以免逃竄後勦辦費力此時胡超等帶領官兵已由樹窩子直驅喀什噶爾計日大兵雲集自可迅解二城之圍該大臣等務當小心防守勿使賊匪竄入以固邊圉而副委任○丁亥諭明年朕五旬萬壽各省督撫及將軍提鎮等俱不准奏請來京祝嘏○戊子裁貴州普定縣屬上五苑枝土千總○己丑諭總管內務府大臣等嗣後王公一二品大臣使用太監數目不必限以定制多少聽其自便自明年爲始宮內當差太監如人數不敷著仍照舊例由宗人府傳知各王公按從前數目由內務府行知著令交進當差○以德興爲左副都御史

由太常寺卿遷

○辛卯諭軍機大臣等據常德等奏烏什卡外布魯特比托依莫特遣伊姪愛達爾伯克等報稱喀什噶爾所有霍罕安集延賊眾

聞得大兵由葉爾羌進勦口稱霍罕有事必須回去僅留圍城賊
匪數百名屬令俟賊衆出卡較遠再隨後出去均於十一月初九
日逃竄出卡仍回霍罕係托依莫特同弟愛散克勒底及眾布嚕
特眼見之事等語此等烏合之衆一聞大兵將臨卽紛紛逃竄早
在朕意料之中是以屢催迅速進兵使該逆匪等猝不及防卽可
痛加勦洗乃遷延至今兵到已在賊遁之後見據托依莫特所報
情形如果屬實是喀什噶爾已無賊勦所謂臨陣生擒之說徒託
空言此時該逆匪等雖已逸出卡外安知不就近潛藏伺我動靜
長齡當豫爲籌計必須將著名逆犯悉數就擒永除後患應如何
設法接捕及懸賞購綫令就縛獻之處著卽飛咨哈琅阿楊芳胡
超妥速辦理見在局勢可無須如許兵丁若因已經征調槩令前
往非特虛糜糧餉且恐所需柴薪等項不無擾累回莊看來不過

需兵一二萬即可足敷調遣著長齡察看情形酌量裁撤以節尤費至胡超前已奏明由樹窩子直驅喀什噶爾嗣據楊芳奏該提督因途次接到楊芳前咨令由軍臺大路行走旋即折回並稱樹窩子以至牌斯巴特俱有埋伏道路空斷等語胡超既已由樹窩子前進復又折回大路如因樹窩子一帶恐有賊匪埋伏即不由彼處行走儻無別路可行豈遂可駐兵不進況統領重兵如途次遇有伏賊正可就勢迎剿焉有轉避賊匪之理今據常德等探報賊情俱已逃逸出卡是所言樹窩子一帶俱有埋伏及道路空斷之說並不確實此言是否出自胡超抑係楊芳因探有此信令其折回其言究竟得之何人並折回改道究係何人至見著長齡密加確訪據實覈奏又據常德等奏喀什噶爾逃出黑帽回子愛孜木沙等供出賊目偽密拉普伯克委拉提偽阿奇木霍扎什俱在

前開賊目名單之外著查明悉行捕獲以淨根株再昨據富俊那彥成條陳善後事宜各一摺著將原摺發給長齡閱看與前次寄給之松筠鄂山條奏各摺片同哈琅阿楊芳一併籌酌妥議具奏○壬辰諭軍機大臣等昨因胡超前已奏明由樹窩子直趨喀什噶爾嗣後折回由軍臺大路行走並稱樹窩子至牌斯巴特有賊埋伏特降旨令長齡查明此信得之何人改道行走究係何人主見據寶覆奏本日據胡超奏行至沙湖兒拏獲逆回薩木克色提巴爾第二名訊稱樹窩子一帶有安集延布魯特及白帽回子因前次大兵由此路進援此次俱安有埋伏將道路挖斷拏有柵子阻截官兵並接楊芳咨稱由大路前進更合機宜鑒昌等亦咨令速援葉爾羌與哈豐阿等會合夾攻賊必逃竄該提督恐由樹窩子進剿欲速反遲耽延時日是以不敢拘泥前奏仍行折回由大

路進兵等語是胡超此次所奏已屬明晰所有昨諭長齡訪查之處著無庸覆奏○哈豐阿奏十一月初六日行至五十里湖灘探得喀拉布扎什軍臺迤東有馬賊數百步賊千餘帶兵夾攻將賊截爲兩斷勦殺百餘生擒五十餘賊竄回莊復放火燒斃五百餘追殺百餘因天晚在彼暫紮俟胡超一二日後趕到合兵西援英吉沙爾卽可直抵喀什噶爾得旨嘉獎○甲午諭軍機大臣等楊芳奏接據扎隆阿來信賊已竄逸一摺據稱十一月十七日扎隆阿差丁常奉清齋到信函內稱賊人自月初以後漸次移營至初十日夜全行逃遁惟細繹來函有此次賊來由於內有句結猝致失事之語當卽訊據常奉清供八月初聞得卡外滋事塔斯哈帶兵去後伊薩克卽報稱我兵大勝與扎隆阿並兵民道喜扎隆阿隨差伊偵探知官兵全行陣歿伊薩克所說盡是虛言扎隆阿因

此疑惑伊薩克又請派接應扎隆阿並未准行當差人前往伊薩克署內暗查適有眾商民稟稱街上見伊薩克車內坐有前次與塔斯哈帶路之五品伯克一同進署扎隆阿卽派官兵同商民數百人將其衙門圍搜房內並地窖中藏匿許多回子並搜出刀矛器械交官存貯扎隆阿將要緊頭目存留質對其餘俱殺見將伊薩克並伊妻派人看守嗣後官兵商民屢次打仗殺賊無數等語伊薩克自上屆軍興急公報效著有勞績經朕加封王爵授爲幫辦大臣此次伊子愛瑪特捐辦糧馬嘉其忱悃亦復疊沛恩施見據長清奏愛瑪特自聞喀什噶爾被困思念其父時常涕泣隨同籌辦一切極爲出力見聞賊遁喜形於色並於九月間將其子阿密提送至伊犁避賊看其光景伊薩克感激天恩不應遽懷攜貳朕思必無其事且上屆克復四城生擒首逆天戈所指迅就蕩平

伊薩克曾經目覩豈不知震懾天威乃反思句結自料有何力量足以抗拒官兵伊薩克雖極糊塗亦不至此再前據長清奏稱米攷呼爾供伊在喀什噶爾聽說前伊薩克帶領官兵並黑帽回子打仗傷壞一千多賊因此人人都恨或者播造謠言扎隆阿與伊薩克素不相能誤聽蜚語亦未可定此時該將軍計已行抵阿克蘇見在賊匪全行逃竄臺路廓清正可輕騎趕緊直抵喀什噶爾著長齡卽作爲該將軍之意密行飛寄扎隆阿將伊薩克妥爲看守勿令稍有傷損儻或有意意外之虞惟扎隆阿是問長齡到彼卽將扎隆阿所稱伊薩克暗爲句結及常奉清所供伊薩克各款逐一研訊明晰務得確情據實具奏至所稱地窖中藏匿器械容有其事若藏匿回子多名扎隆阿同在一城何竟先無見聞並著一併詳細查明長齡等若稍有含混遷就不但負恩誤國一生威望

埽地盡矣諒長齡等必不至如此再頃據長清奏接到楊芳來信
令其將愛瑪特看守業已拘禁在署愛瑪特應否卽在阿克蘇訊
問抑須解至喀什噶爾質訊或卽交長齡帶往著長齡酌量辦理

○哈豐阿奏十一月十二日由葉爾羌前進至黑色爾迤南山邊
一帶追賊沿途勦殺二百餘餘向英吉沙爾逃竄一半竄入黑色
爾回莊官兵圍回莊全行接捕隨追至英吉沙爾迤東之頭臺
托巴拉賊匪遠竄城內已空卽行星馳前進報聞○以沈岐爲內
閣學士兼禮部侍郎銜

由詹事還

毛式郇爲左副都御史

由宗人府府丞還

○

丙申諭哈豐阿等奏援兵追賊西進已將英吉沙爾喀什噶爾二
城解圍一摺稱十一月十四日帶領伊犁烏魯木齊滿漢官兵民
遣壯勇等跟蹤勦賊馳抵英吉沙爾賊匪先經聞風西竄回城已
空面見棍楚克策楞詢知阿奇木伯克斯底克久已從逆官兵疊

次打仗得勝賊匪灌水空城計無所施困守數月至是圍解人人歡忭卽於是日戌刻拔營飭令伊犁委佐領賡音泰率領滿洲營馬隊沿途在各莊搜捕追剿該提督等率領馬步官兵及民遣壯勇順路跟追殺賊多名生擒三百餘名追至距喀什噶爾十數里地方適扎隆阿多隆武帶領城內官兵齊隊前來詢悉賊匪俱往西北一路逃竄隨卽將兵會合一處同至喀什噶爾安撫夷回守護城池一面偵探賊情密拏餘匪俟胡超統兵到時剿洗等語喀什噶爾英吉沙爾被圍已久待援甚亟前經調派各路官兵疊次嚴催帶兵大員無論何人先到卽趕緊進援乃容安昧良觀望坐失事機哈豐阿等領兵先到復聽容安指使繞道和闐再從葉爾羌大路進發以致日久稽延此次賊勢並未猖獗本易剿散哈豐阿等如早剿賊解圍尤當重加懋賞此時雖覺稍遲惟念見在臺

路廓清園城已解究由哈豐阿等首先到彼尙屬可嘉哈豐阿著賞給雲騎尉世職進勇巴圖魯名號孝順尙著賞給副都統銜仍均著交部從優議敘以示鼓勵幫辦大臣塔斯哈前因賊匪滋事出卡追擊副將賴允貴帶兵前往一併俱被陷歿情甚可憫塔斯哈著照都統銜賜卹賴允貴著照總兵例賜卹俾慰忠魂扎隆阿多隆武督率官兵困守三月有餘終保孤城不失國體可嘉可憫著交長齡查明該大臣等守禦情形據實具奏再行降旨施恩至哈豐阿等單開尤爲出力之官員兵勇及另片奏請施恩之伊犁遣勇九百六十九名並著長齡一併查明候旨辦理○己亥胡超奏行抵距木蘇里克莊整隊前進賊匪七八百人抗拒官兵經副將張國相等迎敵殺賊一半餘俱逃竄官兵趕向回莊四面圍攻生擒百餘殲斃數十訊據賊供薩漢莊有賊千餘該副將等前後

夾擊賊披靡四散追殺三十餘里統計殺賊六七百生擒五百餘
報聞○辛丑諭從前內外八旗大員之弟兄子孫每逾五年查閱
一次挑取侍衛拜唐阿富差原因侍衛拜唐阿係體面差使大員
子弟挑取侍衛拜唐阿後伊等益得演習清語技藝騎射差委得
人自道光六年查辦以來已屆五年又應查辦之期惟念該大員
子弟內各有不同或因身弱馬上平常或因自幼讀書一時不及
學習騎射似此之人縱使挑取侍衛拜唐阿焉能得力理宜量加
調劑嗣後在京文職三品以上武職二品以上外任文職自總督
起至按察使止武職自將軍提督起至總兵止該大員之弟兄子
孫內如有年已及歲堪任侍衛拜唐阿差使每遇五年查辦之期
情願挑取者該大臣等仍照上屆呈報本旗由該旗造冊咨送軍
機處氣題經朕指出帶領引見儻身弱有疾或弓馬平常不稱侍

衛拜唐阿者該大臣等卽據實報明該旗轉行軍機處聽其自便該旗亦無庸催取名字以示朕培養旗僕因材器使之意○癸卯上詣 大高殿祈雪○甲辰諭軍機大臣等本日據史致儼吳

椿並御史卞士雲奏接到儀徵縣紳士公信據稱向來淮南綱食引鹽俱歸儀徵掣捆數萬夫役得受傭資以敷口食因聞有鹽課改歸場竈之議夫役人等恐嗣後掣捆不歸儀徵頓失生計約會千數百人赴縣奔訴該知縣已往省代稟等語兩淮鹽務敝壞已極朕特派王鼎等前往江南會同陶澍查辦其課歸場竈一節前據王鼎等具奏大槩情形已委員查勘見尙未據覆奏該處夫役等一聞此信恐失生計遽行約會多人赴縣奔訴實屬愚民無知此事關繫兩淮大局該尙書等務細心籌議如果改歸場竈實有裨益卽覈實會辦妥立章程不可因該夫役等口食無資遂存畏

難苟安之見但事屬改轍更張必期經久可行毫無格礙斷不可稍滋流弊以致激成事端總當體察情形酌量可行與否定議具奏○乙巳諭據王鼎寶興奏請將兩淮鹽務改歸總督管理一摺兩淮官引滯銷鹺務疲敝見據王鼎等奏稱由該鹽政無管轄地方之責文武員弁均非所屬疏銷巡緝難期令行禁止著將兩淮鹽務改歸兩江總督管理所有鹽政一缺著卽裁撤鍾靈著回京當差○戶部尙書王鼎等奏會籌兩淮鹽務擬定章程十五條一兩淮雜費除養廉兵餉外水腳部飯等項作正開銷此外普濟育嬰書院義學等項亦從其舊惟各堂董事濫廁多名 御書樓務本堂孝廉堂等處歲需銀二十餘萬兩應行裁汰各衙門公費及鹽政運司書役辛工紙飯並之商月捐等項歲需銀八十餘萬兩應加刪除再漢口各岸商按引抽捐各衙門公費定爲每引捐銀

四錢永不加增各費共減銀一百十餘萬兩科則成本可以稍輕
一運商請引先向有窩之家出價買單然後赴司納課商家展轉
私售以一紙虛根先正課而享厚利致商本加重昂價病民惟相
沿已久姑留根名每綱每引酌給銀一錢二分嗣後請引按綱給
單不准豫請數綱一領運舊例名目過多致運司衙門書吏多至
十九房商人辦運請引文書展轉至十一次鹽務大小衙門節節
稽查有名無實徒爲需索陋規之具應交運司查明剷併一商課
入庫不分正雜籠統動支迨遇緊餉百計湊解有豫納減納貼息
印本抵課等弊俱應查禁將正項貯庫候解並聽部撥雜費另貯
外庫不許將正項那墊及商人干預一淮南設有總商籌辦通商
公事應擇各商內公正醇謹行鹽最多者數人爲辦事之商至辦
公一項照減定額數指領不准立總商名目一庚寅綱引見已冬

抄尙未行運已丑仍餘積引三分辛卯應開綱豈能一年行三綱之鹽請於道光十一年正月卽開辛卯本綱其庚辰已酉積引隨時帶銷另款存撥遇暢銷提綱時仍補銷以符原額一准南北商欠若接綱帶徵仍致套搭占礙新綱應分別停緩俟課款充裕時歸補內惟帑本利息一項仍在新綱引內攤徵一收鹽桶秤舊有定制請由運司烙發不准私製賣成場官隨時稽察運司於運河要道北橋處所親莅抽秤如格外重斤將秤驗各官參撤一運鹽水腳埠頭串通商夥從中勒扣船戶意圖帶私甘心忍受且有出錢買裝者應將例價照實覈發各船擬次統號連環保結儻仍蹈故習查出嚴辦該埠保一併治罪一鹽船遭險例有津貼並准批補沈失之鹽免其輸課近以守輪待售時日遷延船戶盜賣後鑿沈空船運商例有津貼批補且可分裝多船越輪先售遂相效尤

應停其津貼准其補運不准免課一儀徵河道淤阻應勘估挑濬
卽以挑出之土培築泰隄俾速轉運以輕商本一運鹽向自儀徵
運至漢口折回轉售於各岸往返腳價加重至引地爲江船糧船
各司所隱占應飭鹽道查明各口岸每年額銷引若干將水程豫
爲給發僉商運赴該處俾水販就近領賣水程照例彙繳以免越
運轉折一船至漢西兩岸大商擡價封輪挨賣守候既久百弊叢
生漢岸銷鹽不下二千萬石應派公正之員駐守漢岸會同鹽道
辦理散輪事宜不許再有整輪以免滯銷一鹽務之官有與人聯
姻換帖者俱令回避各場分司大使應照州縣之例察看人地隨
時調換湖南北鹽道督銷功過應歸兼轄鹽務之總督考覈會同
該省督撫具奏以專責成一淮北湖運各岸近年額引銷不及半
積鹽無商收買各竈額求調劑應先行籌款收買竈鹽以濟口食

其鹽存貯各廠俟來年秋單發運時查照銷滯各岸委員領運售
鹽繳價以還原本得旨均著照所議辦理該部知道○辛亥免被
賊滋擾之英吉沙爾等城額賦○是月賑雲南普義縣水災貸江
蘇蘇州等四府州屬駐近災區兵丁銀米緩徵江蘇上元等三十
一州縣衛雲南恩安縣額賦○是歲琉球暹羅朝鮮來貢○會計
天下民穀數各省通共大小男婦三萬九千四百七十八萬四千
六百八十一名口各省通共存倉米穀三千四百五萬四千一百
七十二石二斗七升六合二勺